

Nyovara Wao Paulus Po Ratoe Anugano Amisye Mai No ROMA

Paulus po kove raura

¹ Risyirati Paulus, syanapatambe Yesus Kristus ai, risyamo Amisye po inapatimu muno Po inatutir indamu syo Ayao Kovo Amisy ravov. Syo nyovara waowe so ratoe anugano Amisy wana no Roma wasai.

² Ayao Kovo namije mamono arono wusyinoe Amisye po raurairive ti Apa anawae wo ratoe no Ayao Amisye rai.

³⁻⁴ Ayao Kove so mo Arikainyo Amisye aura kakavimbe Opirati wama Amisy Yesus Kristus. Opamo aeno anasino vatane rai weamo avaki no aneno Daud apa susye rai. Weramu aeno Apa ana no aije rai opamo Arikainyo Amisye piye, weye anuga ndandinit maisyare Amisye amaisy. Muno Amisye po aroron kakavimbe opamo Arikainyo Amisy apa vambunine no Ai arono Po aijaseo kovakato no wene ama uga rai.

⁵ Yesus Kristus bewaramo Amisye po kove raugaje rinai muno Po inatutir apa anakere rai. Po inatutir indamu syo vatano Yahudi jewene mawainde tenambe indamu wanave muno ubeta Kristus ai indamu Apa tame manakoe no mine so rai.

⁶ Muno vatano wana no munijo Roma weap, Amisye po wasawainde tavon to, weti wasisa kawasaeyo Kristus apaura maije mai.

⁷Weti syo nyovara waowe so ratoe vatano Roma wasai tenambe, weapirati Amisye muinyo wasai muno Po wasawainde to indamu weapamo Apa kawasae nawirati weap. Syare kove muno saumane no no wama Injayo Amisy muno Amisy Yesu Kristus no wasautan tenambe.

Paulus beker to no munijo Roma

⁸Manasyimbe syo kove raura seo risya Amisye aijo wasai tenambe. Risambayambe Yesu Kristus apa tame rai, syo kove raura seo weye ridaniv vatane wo ayao wapa anave Kristus aije raura pampambe no rui vayave mine tename so rai.

⁹Amisye po raen risyamo inaemeno wasai rave, weye namane rinit isambayambe wasai. Amisye opirati inanuga ntenami syanapatambe Ai, syo Apa Kavo Yesu Kristus apa Ayao Kove ravov.

¹⁰Weti risambayambe tutir, syo Amisye anajo indamu Po varore raugaje rinai syore syo wasapan.

¹¹Ribekero syore syo wasaen indamu syo kove inta raunande wasai: Syare syo Anawayo Vambunin ama kove inta ratodi wasai indamu weabambunin.

¹²Wetiva wamo wansaijasea wambambunin kava, weye wasanuga ntubai mbambunin arono wapo sya anave raen, muno syo wapa anave raen, ribambunin.

¹³Sya arakovo Roma weap, syare wapo sya bekero syo wasapan raen kakavimbe, weye nu-goenta rave syo sya unanuijo syore wasai rapa-timu, weramu ana inta mo rinaoraive ti.✧ Syare syo anakere raijar no wapa yasyine rai indamu

✧ 1:13 Arakov 19:21

syo vatane inta maugav utavondi Kristus ai, maisyare muno syo rave no munijo kaijinta raive to.

¹⁴ Amisye po inatutiro syo Ayao Kove ravovo vatano Yahudi jewene mansai tenambe—vatano una no kota rai muno vatano una no unate rai; vatano ube sekorave muno vatano ube sekorave jewen.

¹⁵ Wemirati mbewar ribeke dave syo Ayao Kove ravovo vatano wana no Roma wasai tавon.

Ayao Kove mamо Amisye apa vambunine mije

¹⁶ Risyamo risamane Ayao Kove rajje ramu, weye Ayao Kove mamо Amisye apa vambunine mije. Ayao Kove mbambunin indamu mo vatane mapaya ayao kakai rai, vatan tenambe nanawirati wanave Yesuѕ Kristus ai—manasyimbe vatano Yahudi, weramu vatano Yahudi jewene nao tавon.

¹⁷ Weye Ayao Kove mo Amisye apa unanuije raroron, wemi mo vatane mauga ti umamai no Amisye amune rai. Apa unanuijo po ratayao wansai omirati wama anave obo ma, no manasyimbe ntoa ama marane rai. Weye wama anave obo mirati mo wansauga ti wamamai no Amisye amune rai. Maisyare Ayao Amisy mo ratoe mare: “Vatano nanawirati umamai no Amisye amune rai indati ukova nuge nugанui weye wanave.”✧

Amisye po apa pari mangke raugaje vatano wo ayao kakai rave mansai

¹⁸⁻¹⁹ Amisye po apa pari mangke raugaje irati vatano wo ayao kakai rave mansai muno vatano

✧ **1:17** Habakuk 2:4; Galatia 3:11

awa ana udave mamune mansai. Vatane umaso wo Amisye apa ana no aije raen kakavimbe, weye Amisye po rarorono mansai to. Weramu awa ana udave ngkakai mbewaramo wo Apa ayao tugae rawatambe.

²⁰ Vatane inta wo Amisye aeno mansamije rai jeven, weramu arono Amisye po nuge so ranari kaijoe ndea unumeso, Apa ana no aije mamu vatane wo raen kakavimbe no anakotaro ntuna no mine vone so muno anakotaro ntuna no naumo warae rai. Weti mawes vatane unanta Amisye apa anabe muno Apa vambunino noa nuge nuganuije rai no anakotar tenambe Po ranari so rai. Weti vemo vatane inta po raura pare, “Amisye no tugae rako jewena rako, syantatukambe rai,” wemai nora!

²¹ Vatane wo Amisye aen no ivae, weramu wonae wo aura Opamo Amisyo tugae pije. Wo ararimbe ramu muno wo kove raura seo Ai tavone ramu. Onawamo wantatukambe rave weye awa ana wo ratantona mamu ama ine meweno rai muno manuga mamu ngkaumudi kobe. ☆

²² Wo taune mansaura ware wenawamo vatano makarikuga mba dave, weramu onawamo vatano wantatukambe vayave nawa.

²³ Wenawamo ubeaje Amisy opi titi rave Aije ramu, yara ubeaje awa yaro wo ranarije obo rai. Weramu awa yare no tawane ramu, yara Amisye pamo kova nuge nuganui. Muno Amisye pamo apa kovo ntiti no Ai, yara yare mamu ratotovo vatane mansanyi, muno ratotovo insani, tawae, maere kotar ranyi vayave.

²⁴ Wemi mbewar ti Amisye aneme mpaya mai

☆ **1:21** Epesus 4:17-18

indamu utavondi taune awa bekero ngkakainoanive rai kai. Umba awa bekero anaerere mo mauga ti ugwambe taune manasine rai vambinibe.

²⁵ Makirive Amisye ai ti wo Apa ayao tugae rawatambe, yara usakinav wanave ayao arurijate obo rai. Wonae ube sambayambe muno ubeaje irati Amisy opi po anakotar tenambe ranari Aiji, yara ubeaje irati Apa anakotaro po ranari obo rai.* Weramu Amisye obo pi mamaisy, ti wangkangkamambe Aija nuge nuganui. Amin.

²⁶ Maisyare wemai ti, Amisye aneme mpaya vatane wato mai indamu utavondi awa ana manuga ntento rai raronto ti mbe samaneve mai. Wanya inta nawamo ubekero anya maije ramu, yara manuga ntento taune awa wanya bo mansai, ti utitarive mansai.

²⁷ Muno anya inta nawamo unaki awa wanya marijate ramu, yara anya utitarive anya taune mansai. Aya ana yo rave so nggwambe yai. Weti taune wo awa mangke ranawan, mamaisyo awa ana udave ngkakainoanive so rarijati.

²⁸ Wonae wo Amisye atantona akatowi, weti Amisye aneme mpaya mai indamu utatayaje irati awa ana wo ratantona nggwambe raron. Maisyare wemaisy, anakotaro rui wo rave mamano anakotaro mamaisy ramu muno ngkove ramu.

²⁹ Vatane umaso nawamo manuga ntairijo ayao kakai kotaro rui vayave rai, maisyare so: ukakainoanive muno mamun, manuga

* **1:25** Ubeaje Amisye apa anakotaro po ranari, maisyare orame, inyoe, unate, tume ramaisy. Muno ubeaje taune awa yaro wo ranari rai tavon.

ntantunaube muno ngkakai. Upari muno warare, ubekero wo vatane maubaisy, wo vatane maponae muno wo mave tatugadi. Wayao ampambe

³⁰ muno wo vatane maura tantunawi. Manuga mamuno Amisye ai. Mansararin muno ukangkamambe taune mansai. Wo unanuije rakani tutir indamu wo anakotaro ngkakainoanive rave. Muno ubeta awa vatan anui mansai jewen.

³¹ Ana ratantona ngkov meweno mai muno ubeta awa urairi rai jewen. Muinye meweno mai muno maemeno vatane mansai mamu mewen tavon.

³² Wo Amisye apa ayao raen ivae, wemirati mare vatano rui pi po ayao kakai umaso rave, indati Amisye po mangke raugaje ai indamu kakai. Weramu vatane wato wo ayao kakai umaso rave tutir kobe, muno manayanambe arono vatano kaijinta wo rave tavon.

2

Amisye po mangke rapatimu vatan tenambe mansai

¹⁻² Wamo raen Amisye apa mangke mamu maimai dave, wemi Po rapatimugo vatano wo anakotaro ngkakai rave maisyare ratodi umawe rai. Inya, vatane weap! Win dako, are bayave inta nyare nyo vatane inta apa kakai muno apa kove rakani ai indamu nyo mangke rapatimugo ai, weamo winyamo nya nteto rai mangkiki! Weye nyo mangke rapatimu nya vatane inta ai, weamo taune winyo mangke rapatimu taune nai to ije. Weye winyo vatane wato amai tavon; anakotaro

ngkakainoanive po rave mamu winyamo vatan nyo rave tavon.✧

³Weti inya, vatane winy, winyare nyo mangke rapatimu vatane ai apa ana po rave rai, weramu winya ana nyo rave mo apa ramai tavon! Winyo rakarae nyare indati winy mpaya mangke Amisye rai rako?

⁴Nya ana nyo ratantona so mamaisye ramu! Abo, vemo wamantatukambe nora! Amisye atawandi wama ayao kakaije rai weye Apa kove manakoe wansai. Weramu vemo wamo Apa kovo manakoe so rawatambe nora, weye Apa kove ma daugaje indamu mo wansaugav wansakinavo wama ayao kakaije rai.

⁵Wakoe! Weasanuga matu, waponae wasakinavo wapa ayao kakai raiji! Maisyare omaisyamo weapo mangke Amisye ratutumbe taune wasai, weti Apa mangke indati manakoe wasai arono Apa masyoto po vatane manajo awa udave rai. Masyoto naije Amisye apa pari mangke mamu Po raroron kakavimbe.

⁶Indati Po mangke rapatimugo vatane narentabo mansai mamaisyo awa ana wo rave rarijati.✧

⁷Vatan inta wo ana ngkove obo rave tutir, weye ubeker Amisye anayanambe mai muno ubeker Po maijasea titive indamu ukova no tawan. Vatano nanawiso indati Amisye po kovo nuge nuganui raunande mai.

⁸Weramu Amisye apa mangke muno Apa pari je maje irati vatano kaijinta mai, nanawirati wo taune awa mayar dai bo rakani mansai, muno

✧ 2:1-2 Matius 7:1-2 ✧ 2:6 Mazmur 62:12; Amsal 24:12

wo Amisye apa ayao mamaisye rawatambe yara utavondi ayao mamun mine so obo rai tutir.

⁹ Vatano are nawirati wo ayao kakainoanive rave, weamo siurije indati mo mansakep muno anakotaro ngkakai nande mai—manasyimbe nande vatano Yahudi umba vatano Yahudi jewene mai tavon.

¹⁰ Yara vatano are nawirati wo ana ngkove rajjar tutir, indati Amisye anayanambe mai ti Po maijasea titive muno Po apa kovo saumane raugaje manuga rai—manasyimbe vatano Yahudi umba vatano Yahudi jewene mai tavon.

¹¹ Weye Amisye po vatane kotare inta mansamamaribe ramu,[☆] yara Po vatano Yahudi muno vatano Yahudi jewene mansaen mamai tenambe.

¹² Vatan tenambe wo ayao kakai rave, weti indati awa mangke maje mai. Vatano Yahudi onawamo Amisye indati po awa ayao kakai ama mangke rapatimugo mai mamaisyo Ananyao Musa rai. Weramu vatano Yahudi jewene nawamo wo Ananyao Musa raene ramu, weti awa mangke mamu Amisye po rapatimu mamaisyo Ananyao Musa raije ramu. Yara Po mangke raugaje mai mamaisyo awa ayao kakai rarijati.

¹³ Weye vatano wo Ananyao Musa raraniv bayave onawamo umamai no Amisye amune raije ramu. Yara vatano nanawirati ubeta Ananyao Musa rai masyote rinit wenawirati umamai no Amune rai.

¹⁴⁻¹⁵ Vatano Yahudi jewene wo Ananyao Musa raene jeben, weramu ranivara wo ana ngkove

[☆] **2:11** Ulangan 10:17; Arakov 10:34

raen ti ubeta rai, weamo ananyao Amisye ntuna manuga rai to ije. Wo Ananyao Musa raene jewen bayave, weramu ranivara awa ana udave mamamo mamaisyo Ananyao Musa mo ranyao rai, omamo mo raroron kakavimbe ananyao ntuna manuga rai to. Weye taune manuga mo awa ana udave raen inta mi ngkov, inta mi ngkakai.

¹⁶ Amisye apa masyoto makare umu indati Po Yesus Kristus atutir indamu Po vatane manajo awa ana udave rai. Arono naije Po mangke rapatimugo awa anakotaro ngkokaibe no manuga rai tenambe. Wemamo mamaisyo Ayao Kovo syo ravove rai.

Vatano Yahudi wo Ananyao Musa raen dave, weramu mo maveti umamai no Amisye amune raije jewen

¹⁷ Inya, sya arakovo Yahudi weap! Wakangkamambe wapare, “Reamamo vatano Yahudi, weti reamamo Amisye taune apa kawasae nawirati ream.” Wapanave Ananyao Musa rai weye wapo rakarae omi mo wasauga ti wamamai no Amisye amune rai.

¹⁸ Muno wapare wapo Apa bekere raen dave. Wapo Ananyao Musa ranyao tutir, weti anakotaro rui mi ngkov, rui mi ngkakai, wananta rai.

¹⁹ Wapo ratantona wapare weapamo wabe unanuive vatano wantatukambe Amisye aije mansai, onawamo maisyare vatano mansamije ntuba mansamaisy weye una no kaumure rai. Wapo rakarae wasaurata irati varo mbaro mansai.

20 Muno wapo raura wapare weapamo kuruno wapo ananyao raugaje vatano nanawirati wanatukambe muno awa ana wo ratantona matu rainye mansai. Wapo rakarae wapo mansanyao weye wapaura Ananyao Musa rai, wemirati ayao tugae muno mamaisye ratoe rai tenambe.

21 Sya arakovo Yahudi weap, vemo wasararin tai mai nora! Weapamo wapare wapo vatano kaije mansanyao, yara wapo taune wasanyao ramu! Wapo ananyao raugaje wapare, “Vemo nyanaonoambe inya,” weramu wabeanimaibe taune wepanaonoambe?!

22 Muno wapo raura wapare, “Vemo wapo anaerere rave inya,” weramu wabeanimaibe taune wapo anaerere rave?! Muno wapare, “Vemo wabeaje yare rai jinya,” weramu wabeanimaibe wasisa yare ama yavare rai wapo ama ananuge raugav?!

23 Wasanuga rararin weye Ananyao Musa omamo Amisye po raugaje wasai to, weramu wabeanimaibe wapo Apa ananyaowe so rakanyoandi?! Wapa ana wadave mo Amisye ave arikaimbe rave!

24 Maisyare Ayao Amisye mo ratoe so ramaisy: “Vatano Yahudi wepirati wabewaramo vatano mine so wo tamo Amisye raura tantunawi.”[☆]

25 Vatano Yahudi weap, wadaen koano sunat mbe rarorombe wasato sisa Amisye apa kawasae mai. Weti ranivara wabeta Ananyao Musa rai mavabe, weamo koano sunat omamo ngkovo wasai. Weramu ranivara wapo Ananyao Musa

☆ 2:24 Yesaya 52:5; Yehezkiel 36:21-22

rakanyoandi, weamo koane umaso ama ine meweno rai.

²⁶ Vatano Yahudi jewene nawamo utavondi sunat rai jewen. Weramu ranivara vatano Yahudi jewene inta apa ana dave ngkov mamaisyo Ananyao Musa mo ratoe rai, wea umba Amisye po vatano napije aen pare opamo ato siso Apa kawasae matavon.

²⁷ Indati vatano Yahudi jewene wato po vatano Yahudi wapa ayao kakai raroron ti wasamane. Weye weapamo watawondi sunat rai muno Ananyao Musa omamo raugaje wasai to, weramu wapo rakanyoandi tutir. Yara vatano Yahudi jewene umawe apaura Ananyao Musa raije jewen, yara beto ama ananyao rai.

²⁸ Vatano Yahudi tugae pamo apa be Yahudive raen no anakea vone rai jewen. Weti vatano avaki susyo Yahudi rai dako, be sunativea rako, omamo Amisye po inta ratore ramu.

²⁹ Yara vatano Yahudi tugae pamo apa be Yahudive no no anuga bo rai, arono anuga mamamo mai no Amisye amun. Muno Anawayo Vambunin wemi mo anuga raveti mamaisy, yara Ananyao Musa po ratoe wemi mo aveti mamaisya jewena. Vatano napije pamo Amisye anayanambe ai ti kangkamambe ai, weramu vatane ukangkamambe ai mi po rakanija jewena.

3

Amisye teto Apa urairije rai

¹ Maisyare omaisy, vatano Yahudi inta umaundive rai, wo ratantona ware, “Weti wambe

Yahudive ama ngkove inta no rai rako? Muno wama sunat omamo ama ngkove noare rui?”

² Umba sya ayao syo rasakinave no taiso: Tugae rave, reambe Yahudive ama ngkove manakoe rave muno nde anakotare rai tenambe. Manasyimbeamu vatano Yahudi reamirati Amisye panave reansai indamu Po apa ayao raugaje reansai.

³ Vatano Yahudi reamo urairije raokokaisyo Amisye ai to reamare reambeta Apa ayaowe rai tutir. Weramu Yahudi inta nawamo una tawan no awa urairije umaso rai jewen. Indako Amisye pamo no tawan no Apa urairi rai jewen tavon dako?

⁴ Jewen bayave! Amisye pamo no tawan no Apa urairije rai tutir. Vatan tenambe wayarurijabe, weramu Amisye pamo payarurijabe ramu muno Apa ayao mamu no rai tugae kobe. Mamaisyo Ayao Amisye mo ratoe so rai:

“Amisyo winy, reandaen Nya ana nyo raura omamo ayao mamaisy.

Weti ranivara vatane wo nangkivan ware Nya ana ndave inta ngkove ramu,
weamo Nyo mapinde tenambe, weye Nyo ayao mamaisye mi ndaura.”✧

⁵ Wakoe! Vatano wantatukambe ware Amisye po ayao mamaisye rapatimu jewen, wo ratantona ware, “Wama ayao kakai mamu ama kove inta no rai. Weye ranivara wamo ayao kakai rave, weamo vatane wo Amisye apa mamaisye raen kakavimbe. Weti ranivara wama ayao kakai mo

✧ 3:4 Mazmur 51:4

Amisye anuga mamaisye raroron, weamo vean-imaibe pariyo reansai? Apa mangke po raugaje reansai mamamaisye ramu!”

⁶ Abo! Ranivara Amisye pamo po ayao mamaisye rapatimu jeben datire, indati Po mangke rapatimugo vatano mine so mansai kakai. Weramu Amisye apa ayao po rapatimu mamamaisy!

⁷ Muno vatano wantatukambe wo raura tavonare so: “Wama ayao aarurijate ama kove inta no rai. Weye arono wamayarurijabe, vatane wo Amisye ararimbe ware opamo payarurijabe jeben. Weti vatane wo Amisye ararimbe tai maisy, weamo vemo Amisye pariyo wama ayao kakai rai nora!”

⁸ Ayao mamaisye jewene namije mamaisyo ayao omane so rai mare, “Wade ramu wamo ayao ngkakai rajaro wansai indamu Amisye apa kove ntipu!” Ee! Ayao umaso ngkove ramu, weramu vatan inta wo inaura tantunawi ware risyi syo ravov. Kove mamamaisye po mangke raugaje vatano nanawije mai!

Vatan inta mamai no Amisye amune rai jeben bintabo

⁹ Weti sya ayao idaura maisyare so: vatano Yahudi wo vatano Yahudi jewene makivane ramu. Weye ayao kakai ama vambunine mbe akarive irati vatano Yahudi mai muno vatano Yahudi jewene mai kava, maisyare syo raura umawe rai.

¹⁰ Maisyare Ayao Amisye mo ratoe somaisy mare:

“Vatan inta mamai no Amisye amune rai jewen bayave,
intabo dako, jewen bintabo.

11 Vatan inta po ana ngkove raene jewen,
muno inta po Amisye akani jewen tavon.

12 Vatan tenambe makirive Amisye ai,
utavondi unanuijo ngkakai rai.

Vatan inta po ana ngkove rave ramu,
vatan inta mamaisy jewen bayave.✠

13 Awa ayao muje manuga rai mamu ngkakai,
raurata irati vatane anasino kopa mandami ti
mbaug no aipapo rai.

Aarurijate ntairi mansawa rai,
awa ayao mamu mamun maisyare tawae ma-
mune ramaisy.✠

14 Anaamatane kapainyo mansai ntairi mawa
rai.✠

15 Wavave wo vatane maotar wo maubaisy.✠

16 Uta no rui rui vayave wo siurije muno ana
nsosobe raugavere.

17 Weramu wo ayao saumane rarijate jewen weye
wantatukambe rai.✠

18 Muno wo Amisye asyaniv omamo meweno
mai.”✠

19 Ananyao Musa mamu raugaje irati vatano
Yahudi mansai, weti wandaen ama anakotar
tenambe mo ratoe rai mbe akarive Yahudi mai
indamu ubeta rai. Weti vemo vatan inta po
raura pare, “Risyamo ayao kakai meweno rinai,”
weinya! Weye vatan tenambe no mine so wo

✠ 3:12 Mazmur 14:1-3, 53:1-3; Pengkotba 7:20 ✠ 3:13 Mazmur
5:9, 140:3 ✠ 3:14 Mazmur 10:7 ✠ 3:15 Yesaya 59:7; Amsal 1:16
✠ 3:17 Yesaya 59:8 ✠ 3:18 Mazmur 36:1

ayao kakai rave, weti indati Amisye po mangke rapatimugo mai.

²⁰ Ananyao Musa mo vatane mauga ti umamai no Amisye amune raije ramu, weye vatan inta po rarijat tenambe jeben bayave. Yara Ananyao Musa raugaje indamu mo wansanyao ti wamo wama ayao kakai raen kakavimbe.

Vatane umamai no Amisye amune rai weye wanave Yesus ai

²¹⁻²² Amisye apa unanuijo po ratayao indamu wamamai no amune rai omamo Ayao Musa muno Ayao Anawae yo raurairive to, muno soamo raroron kakavimbe no taiso: Wamanave Yesus Kristus ai, weamo Amisye pare wamamai no Amune rai. Weramu wambeta Ananyao Musa rai omirati mo wansaveti wamamaisy oma jeben. Amisye apa unanuije umaso mamu Po ratayao vatan tenambe mansai. Weti vatano are nawirati wanave Yesus Kristus ai, weamo Amisye pare umamai no Amune rai. Vatane inta sasye ramu: Amisye po vatan inta aena amuinyo vatano kaijinta aije ramu.

²³ Weye vatan tenambe wo ayao kakai raijaro mansai, weti ugwaravainy irati Amisye ai muno Apa kovo ntiti rai.

²⁴ Amisye apa kove maweso vatane mai indamu Po maveti umamai no Amune rai. Po maveti umamaisy weye Yesus Kristus po mapaya ayao kakaije rai to.

²⁵ Amisye po Kristus atutir de kakai indamu Po vatane awa ayao kakaije ama mangke ranawan, Apa mavu nsororop indamu Po awa ayao kakai rapaya mai arono wanave Ai, wirati Po maugav

wakare Amisye ai. Maisyare wemaisy, wandaen Amisye pamo mamaisy muno Po ayao mamaisy obo rapatimu. Weye arono wusyinoe vatane wo ayao kakai rave, weamo Amisye pavave po mangke raugaje mai jewen, yara atawandi mai.

²⁶ Weramu Amisye animari ayao kakai umaso raije jewen, yara Po ama mangke raugaje ntuna Kristus ai indamu Po ranawan vatane mansamarom no inyo kapite rai. Weti naisoamo wandaen Amisye pamo mamaisy weye Po mangke rapatimuga mamai dave, muno Po raura pare vatano wanave Yesus aije umamai no Amune rai.

²⁷ Maisyare omai ti, vemo wansararin nora muno wansanuga manakoeyo Ananyao Musa rai nora! Weye wambeta ama ananyaowe rai omi mbewar wamamai no Amisye amune raije jewen. Yara wama anave Yesus Kristus aije mbewaramo wamamai no Amisye amune rai.

²⁸ Maisyare omai ti, wamo raen: Vatane apa anave obo mi mbewar ti mamai no Amisye amune rai, yara po Ananyao Musa rarijat weamo mamaisy ramu.

²⁹ Indako Amisye pamo vatano Yahudi obo awaura Ai rako? Muno Opamo muinyo Yahudi obo mansai rako? Jewena! Yara Amisye muinyo vatano susye kaijo mine so mai tenambe muno Opamo awa Amisye pije tavon.

³⁰ Weye Amisye pamo intabo. Wepirati po vatano Yahudi maveti umamai no Amune rai arono wanave Kristus ai, muno Wepirati po vatano susyo kaijinta maveti umamai tavon arono wanave.

³¹ Weti wama anave omi mbewar wamamaisy, yara Ananyao Musa ma jewen. Weramu vemo wamo ananyao umaso ramauta nora! Yara arono wamanave, naije umba wamo ananyao ama kove raen kakavimbe ti wambeta rai.

4

Abraham mamai no Amisy amune rai weye panave Amisy ai

¹ Soamo syare wamo Abraham atantona rati, weye opamo vatano Yahudi reama anena pije. Animaisy mi Abraham po rave indamu mamai no Amisy amune rai?

²⁻³ Ayao Amisy mo raura mare, “Abraham panave kobe Amisy ai. Amisy po apa anave so raen, weti Po aveti mamaisy Amune rai.”[☆] Weti Abraham apa ana daijaro aneme rai wemi mo aveti mamaisy Amisy amune rai oma jewen, maisyare omai ti vemo Abraham ararin dai nora. Weramu ranivara apa ana daijaro aneme rai wemi mo aveti mamai datire, wea ararino rai kai.

⁴ Arono vatane po anakere raijar, weamo apa akari po apa doiye ravae. Weramu akari po doiye raunanto vayave jewen, yara po ravae mamaisy apa anakere rarijati.

⁵ Weramu Amisy pamo sasye weye wama ana wandaijare omi Po ratore jewen. Yara vatano rui pi panave pare Amisy obo pi po vatane awa ayao kakai rapaya mai, weamo Amisy po apa anave umaso raen pare vatano napije pamo mamai no Amune rai.

[☆] **4:2-3** Kejadian 15:6

⁶ Wusyinoe Daud payao maisyare wemai tavon pare kove ngkov irati vatano are nawirati Amisye po maveti umamai no Amune rai, Po awa ana udaijare ratore ramu. Daud apa ayao mi so:

⁷ “Vatano are nawirati awa ayao kakaije mamu Amisye po rapapaya ti rakanive, onawamo manayanambe.

⁸ Tugae, vatano awa ayao kakai mamu Amisye po ratore ramu, onawamo manayanambe rave.”✧

⁹ Indako Amisye apa kovo namije mamu Po raugaje irati vatano Yahudi obo mansai rako? Jewena! Yara Amisye apa kove somamu Po raugaje irati vatano Yahudi jewene mansai tavon. Maisyare syo raura umawe rai: Abraham panave kobe Amisye ai, weti Amisye po apa anave so raen ti Po aveti mamai no Amune rai.

¹⁰ Weti arono rui rati Amisye po Abraham apa anave so raen? Indako arono Abraham be sunative to we rako? Wea jewena! Yara Amisye po Abraham apa anave raen ti pare opamo mamaisy arono be sunative rainy.

¹¹ Umba Abraham be sunative rijabe, omamu mbe rarorombe Amisye po aveti mamai no Amune rai weye panave Ai to. Weti wamu raen kakavimbe arono Abraham be sunative rainyamu Amisye po Abraham aveti mamai no Amune rai to. Maisyare omai ti, Abraham be ajaive vatano nanawirati wanave Amisye ai yara ube sunative jewene mansai. Wenanawamu Amisye po awa anave raen ti Po maveti umamai no Amune rai.

✧ 4:8 Mazmur 32:1-2

12 Muno Abraham be ajaive irati vatano ube sunative mansai tavon, nanawirati wanave Amisye ai maisyare muno Abraham panave arono be sunative rainy.

Amisye po apa urairi raugaje vatano wanave Aije mansai

13 Wusyinoe Amisye purairive Abraham muno apa susyo miridije nto mansai pare indati awaura mine so rai tenambe.✧ Abraham beto Amisye apa ananyao rai omi mbewar ti Amisye purairive tai maisy omamo jewen. Yara Amisye po urairije umaso raugaje weye Abraham panave Ai ti Po aveti mamaisyo Amune rai.

14 Ranivara Amisye po apa urairije raugaje irati vatano ubeta Ananyao Musa rai obo mansai, weamo anave mamamo ama ine meweno rai muno urairijo Amisye mamamo ana tamoene ma.

15 Ananyao Musa mamamo vatane wo rakanyoandi, weamo Amisye po apa pari mangke raugaje mai. (Weramu ranivara ananyao raugaje jewen datire, weamo vatane wo rakanyoandi ramu.)

16 Weti anave omi mbewar Amisye po apa urairije raugaje wansai, indamu mamaisyo Apa kove rai. Maisyare wemaisy, Apa urairije ama ruke no no Apa kove rai. Muno wandaen Po apa urairi raugaje Abraham apa arikainye wansai tenambe aje. Weti Po apa urairi raugaje vatano ubeta Ananyao Musa rai obo mansai jewen, yara Po raugaje tavon irati vatano awa anave mamaisyo

✧ 4:13 Kejadian 13:14-17, 17:4-6, 22:17-18; Galatia 3:29

Abraham apa rai mansai. Weti Abraham pamo wan tenambe wama injaya piye.✧

17 Amisye apa urairije umaso mamu Ayao Amisye mo ratoe taiso: “Abraham, Risyo natayao patimuve wimbe ajaive susye manui no mine so rai.”✧ Maisyare wemaisy, Abraham be ajaive wansai tenambe no Amisye amun weye panave kobe Ai. Amisyo Abraham panave Aije so Wepi-rati po vatano ugwenene maijasea ukovakato no wene rai. Muno Amisye so wepi payaowa anakotaro raen dainye no.

18 Arono naije Abraham apa akoe matu to muno apa arikainye inta aeno ai rainy, weramu panave no tawan no Amisye ai muno anaveano Amen tutir. Wemi mbewar opamo be ajaive po susye manui mampam, mamaisyo urairijo Amisye po raokaisyo ai rai: “Abraham, nya susyo nyo mam-pame indati manui rave.”✧

19 Arono naije Abraham po raen opamo be vatan anuive to, apa tume nanto no tename nadani, muno apa anamu omamo wanya nte bayave ma. Weramu Abraham apa anave mayondi ramu.

20 Muno anuga mamauno urairijo Amisye rai jewen, yara apa anave miridi nseo ti po kove raura seo Amisye ai.

21 Anuga ntindimu Amisye ai ti po raura pare, “Amisye bambunin po apa urairije raveti mamaisy.”

22 Wemi mbewar Amisye po Abraham apa anave so raen, umba Po aveti mamai no Amune

✧ 4:16 Galatia 3:7 ✧ 4:17 Kejadian 17:5 ✧ 4:18 Kejadian 15:5-6

rai.

²³ Ayao so, “Amisye po aveti mamai no Amune rai,” omamo nsopi Abraham obo ai ramu,

²⁴ yara ratoe wansamarom tavon. Weye Amisye indati po wansaveti wamamai no Amune rai tavon, weye wamanave Injayo Amisy opi po wama Amisy Yesu aijaseo kovakato no wene ama uga raije Ai.

²⁵ Yesu po anasine raunanto indamu kakaijo wansai weye wama ayao kakai ntapekano wansai, umba Amisye po aijaseo kovakato no wene rai indamu Po wansaveti wamamai no Amune rai.

5

Kristus po wansaugav wamakare Amisye ai

¹ Maisyare wemai ti, soamo wamamai no Amisye amune rai weye wamanave Ai. Wetiva Amisye anuga nsaumano wansai muno wansanuga nsaumano Ai, weye wama Amisy Yesu Kristus de po saumane so raugavo wansai.

² Muno Kristus po Amisye apa kove raugavo wansai tavon indamu no wansautan tutir, weye wamanave Ai. Weti wansananibe rave weye wansanave ramene mamu Amisye apa kovo ntiti indati wantavondi wamaura rai.

³ Muno wansananibe Amisye apa kove umaso obo raije ramu, yara wansananibe tavon arono wansiuri. Weye wandaen arono siurije nande wansai, umba wansatawandi raije ntubai ti mbambunin.

⁴ Muno ranivara wambambunin wansatawandi, weamo anakotaro mo wansatopane mamu wamo ransui. Muno ranivara wamo

ransui, weamo wansanave Amisye amene mamomiridi nseo.

⁵ Muno wansanave Amisye amene mbeamarudi jewen, weye wandaen Apa ana poraurairive wansai omamo indati Po raunande aje, weye Opamo muinyo wansai rave. Apa Anawayo Vambunino poraugaje wansai Wemi mo Amisye apamuinye so raugasyo ntuna wansanugarai.

⁶ Amisye apamuinye maisyare so: Arono wamayondi ti wamo wama ayao kakairapaya wansai kakai, naije Kristus kakaijowansai, aronomasyoto Amisye porapatimu.

⁷ Vatano mine so nawamo awamuinye mamaun, weye vatano mine so ukakaijowarakove inta ai omamo maweseramu. Weramuranivara vatane inta pamo anugangko dave rave, weamo vatane intaborako jirumdako umayar ukakaijovatanokovonapije ai.

⁸ Weramu Amisye pamo po apamuinyomanakoe rarorono wansai weye Po Kristus atutirindamu kakaijowansai arono wama ayao kakaitano wansaijanene.

⁹ Amisye powansaveti wamamai no Amunerai weye Kristus kakaijowansai, wetitugae indati Kristus powansapaya Amisye apapari mangkerai jaje arono Apa masyoto pomangkerapatimunde nande.

¹⁰ Arono wambe marovave Amisye ai no wusyinoe, apa Kavokristus kakai indamu Powansaugav wamakare Amisye ai. Wetitugae indati Kristus powansapaya Amisye apapari mangkerai jaje, weye Kristus kovanotawan.

¹¹ Muno obo rai jewen! Yara wansananibe

tavon weye Amisye po wama Amisy Yesus Kristus atutir Po saumane raugavo wansai. Kristus opi bewar soamo Amisye anuga nsaumano wansai muno wansanuga nsaumano Ai.

Adam po wene rauga to, yara Kristus po kove raugav

¹² Arono Adam po ayao kakai rave no wusyinoe, naije ayao kakai nsiso mine so rai. Weti vatan intabo umaso po ayao kakai raugavo mine so rai tenambe, muno apa ayao kakaije mo wene raugav tavon. Umba wene manya vatan tenambe mansai vintabo weye vatan tenambe wo ayao kakai rave vintabo.

¹³ Arono Ananyao Musa raugaje rainy, ayao kakai ntami mine so rai to. Weramu ayao kakai namije mammo Amisye po ratore ramu weye Po Ananyao Musa raugaje rainy.

¹⁴ Maisyare wemai damu arono masyoto Adam aijoe mansanan ava masyoto Musa ai, wene mo vatan tenambe maugav. Awa ayao kakai ma-maisyo Adam apa ayao kakai raije ramu, weramu wene mo maugav weye onawamo vatano awa ayao kakai no mai.

Adam aurata irati Vatano de rijabe akato Ai, opamo Yesusa pije.

¹⁵ Weramu vatane jirume so aya ana yo rave inta apa nsasye inta Apa rai, weye Adam po ayao kakai rave, yara Yesus Kristus po kove raunande. Muno Adam apa ayao kakai mo wene raugavo vatan tenambe mansai. Yara Yesus Kristus po kovo manakoe raugaje ti maweso vatan tenambe mansai. Weti Amisye apa kove mo Adam apa ayao kakai rakivan.

¹⁶ Adam apa ayao kakai intabo mo Amisye apa mangke raugavo vatan tenambe mansai. Weramu Amisye apa kove nsasye irati ayao kakai intabo umaso rai. Weye Apa kove mawes, weti Po ayao kakai manui rave rapaya vatane mai muno Po vatane maveti umamai no Amune rai.

¹⁷ Vatan intabo apa ayao kakai omirati mo wene raugavo vatano mine so mansai tenambe. Weramu Yesus Kristus apa ana po rave mo Adam apa ana po rave rakivan. Weye vatane intabo so, Kristus, bewar ti Amisye po apa kovo manakoe raugaje mawebe vatano wanave Kristus aije mai muno Po maveti umamai no Amune rai. Vatano nanawiso indati ukova nuge nuganui muno utavondi Kristus apa be akarive rai.

¹⁸ Weti Adam apa ayao kakai intabo mo Amisye apa mangke raugavo vatan tenambe mansai, yara Kristus apa kovo intabo mo vatan tenambe mapaya awa ayao kakaije ama mangke rai indamu ukova nuge nuganui.

¹⁹ Vatan intabo umaso, opirati Adam, beto Amisye aije ramu, wirati vatane wanui rave onawamo vatano ayao kakai no mansai. Weramu Vatan intabo akato, Opirati Kristus, beto Amisye ai rave, wirati vatane wanui maveti umamai no Amisye amune rai.

²⁰ Amisye po Ananyao Musa raugaje indamu mo vatane manyao wo awa ayao kakai raen kakavimbe, weye wo ananyao umaso rakanyoandi ti manui rave to. Ayao kakai merere nseo manakoe, weramu Amisye apa kove nseo ti mo ayao kakai umaso rakivan.

²¹ Wusyinoe ayao kakai mbambunin ti mbe

akarive vatano mine so mansai wirati wene mo maugav tenambe. Weramu soamo Amisye apa kove wemirati mbambunin dave ti mbe akarive wansai. Amisye apa kove mbe akarive indamu Po wansaveti wamamai no Amune rai, wirati wamaura kovo nuge nuganuije rai, omamo wama Amisy Yesus Kristus po raugaje wansai.

6

Kristus po wansapaya ayao kakai ama vambunine rai, weti vemo wamo ayao kakai rave tutir nora

¹ Amisye po wama ayao kakaije rapaya weye Opamo bekobe rave, Apa kove manakoe. Weti wamo ayao kakai rave tutir dako indamu Amisye apa kove miridi nseowa manakoe kobe rako?

² Wakoe! Vemo wamo ratantonanare wemaisy inya! Ranivara wamo ayao kakai rave tutir, weamo mamaisye ramu. Weye soamo ayao kakai mbe akarive wansai jakatoe ramu, yara wamamo maisyare wantavondi Kristus ai arono kakai to wemaisy.

³ Syare wasaemen: arono wansaugasya kuvuni mana raijoe indamu wambe intabove Ai, omamo maisyare wangkakai Kristus atavon to.

⁴ Tugae, arono wansaugasya kuvuni mana rai, omamo maisyare wangkakai Kristus atavon muno wansantuna atavon no aipapo rai. Weti maisyare Kristus kovakato no wene rai weye wama Injayo Amisye po apa vambunino ntiti raugaje Ai, maisyare wemaisy wangkovo wanyimbe weye Po kovo wanyine raugaje wansanuga rai.✧

✧ 6:4 Kolose 2:12

⁵ Wambe intabove Kristus apa kakai rai, weti tugae rave indati wambe intabove Apa kovakato rai tavon.

⁶ Syare wansaemen: Wama ana wamo rave no wusyinoe mamu mewen to, weye wamamo maisyare wantavondi Kristus ai arono auseo sawa inyo kapite rai wemaisy. Weti wamamo maisyare wangkakai Kristus atavon indamu wansanasine so ama ayao kakai ama vambunine raubaisy, indamu vemo ayao kakai mo wansaijaro arove rai jakato nora.

⁷ Weye are pirati kakai to, opamo Amisyé po apaya ayao kakai ama vambunine rai to.

⁸ Wangkakaijo Kristus atavon to, weti wamanave wamare indati wangkovo atavon.

⁹ Wamo raen Kristus kovakato no wene ama uga rai to, weti indati kakai jakatoe ramu, weye wene ama vambunine mo aijar akatoe ramu.

¹⁰ Kristus kakai intabo obo kobe indamu Po ayao kakai ama vambunine rapinde. Soamo Opamo kova no tawan indamu Po Amisyé apa bekere rarijat tutir.

¹¹ Syare wapa bekere maisyare Kristus apa bekere umaso ramai tavon, indamu wapo raura patimuve wapare, “Risyamo maisyare rikakaijo Kristus atavon, weti ayao kakai mo inaijar akatoe ramu. Soamo rijaisy akato no Yesus Kristus ai weye ibe intabove Ai, ti ribeker syo Amisyé apa bekere obo rarijat.”

¹² Maisyare wemai ti, vemo ayao kakai mbe akarive wasanasine rai jakato nora, muno vemo watawondi ama bekero ngkakainoanive rai nora.

¹³ Wasanasine ama kotar, maisyare wasaneme ndako wasami ndako muno kotaro rui, vemo wapo raunanto ayao kakai rai nora. Vemo wapo wasaneme ndako veano anakotaro mamune rajja nora. Yara wapo wasanasine raunanto Amisye ai indamu wapo wasanasine ama kotar veano Apa bekero ngkove obo rajjar. Weye weapamo maisyare vatano wakovakato no wene ama uga rai to, weti syare wapa ana wadave ngkov bintabo.

¹⁴ Weapamo ayao kakai mbe akarive wasai jakato ramu, weye soamo wana Amisye apa kove rai ti omirati mbe akarive wasai. Weti wana Ananyao Musa ranem ate rai jakatoe ramu.

Wamo taune wansaunanta Amisye ai indamu wambeta Ai

¹⁵ Soamo Amisye apa kove no wansautan ti wana Ananyao Musa ranem ate rai jakatoe ramu, weti ayao kakai mamu noare rui? Wamo rave kai rako? Weramu indati wamo rave nora!

¹⁶ Wandaen ranivara vatan inta po taune aunanto vatano kaijinta ai inda beto ai, weamo opamo awaino vatano aro pa. Ayao kakai mamu maisyare wemaisy, weye ranivara wamo taune wansaunanto indamu wamo ayao kakai rave, weamo ayao kakai mo wansaijaro arove. Umba ayao kakai mo wansauga ti wangkakai. Weramu ranivara wamo taune wansaunanto Amisye ai inda wambeta Ai, weamo Po wansauga ti wama-maisy Amune rai.

¹⁷ Wusyinoe weapamo ayao kakai mbe akarive wasai ti mo wasaijaro arove. Weramu kove raura seo Amisye ai! Weye soamo wasanuga ntenami

wabeto ananyao tugae rai, wemirati vatane wo ravovo wasai to.

¹⁸ Amisye po wasapaya ayao kakai ama vambunine rai indamu vemo mo wasaijaro arove akato inya. Yara soamo weapamo vatano wapanapatambe Amisye ai indamu wabeta ana ngkove obo rai.

¹⁹ Ananeneae arove umaso mamu syo raura wasai indamu maweso wananta sya ananyaowe rai. Wusyinoe wapo wasanasine raunanto ayao kakai rai indamu watavondi ama bekero ngkakainoanive rai, weti wapa ana wadave mamu nggwambe munu mamun dave. Weramu soamo syare wapo wasanasine raunanto wapanapatambe Amisye obo ai, indamu wapa ana wadave mamu mamaisy munu ngkakavimbe.

²⁰ Arono ayao kakai mo wasaijaro arove no wusyinoe, watavondi wapa bekero rui vayave rai weye Amisye apa bekere mbe akarive wasai jwen.

²¹ Wabeare naije ama kovo mo raunande wasai mamu maisyare rui? Mewen bayave, yara soamo weasamane wapa ana wadave wusyinoe rai! Ayao kakai ama marane mamu mo wene raugavo wasai.

²² Weramu Amisye po wasapaya ayao kakai ama vambunine rai to, munu Opamu be akarive wasai. Apa be akarive wasai omamu mo kove raugavo wasai weye Po wasanuga ratayao da ngkakavimbe, munu ama marane mamu wangkova nuge nuanui.

²³ Ayao kakai ama mamu mo raunande mamu wenem. Weramu Amisye apa po raunande mamu

kovo nuge nuganui, weye wambe intabove wama Amisy Yesus Kristus ai.

7

Ananyao Musa mo wansaokaisy akatoe ramu weye Yesus apa kakaije mo wansapaya rai to

¹ Sya arakove weap, wapo ananyao ama parenta raen omamo mbe tanamamoambe vatane ai arono wene nde ai rainy. Weramu ranivara kakai to, naije ananyao parenta ama vambunine mo aijar akatoe ramu.

² Maisyare ananyao vauname no tai somaisy: wanya mbauname mamu ama vauname so mo ama anap pe yaokae ti matu. Weramu ranivara ama anya kakai, weamo ananyao umaso mo wanya so raokaisy akatoe ramu, yara mpaya rai to.

³ Ranivara ama anya ta no yara nikijo anya kaijinta arijat, weamo wanya umaso rawainamo wanya anaerere ma. Weramu ranivara ama anap kakai to, weamo ananyao mo raokaisy akatoe ramu. Weti mo anya kaijinta aovan akato, weamo mo aovan kai, omamo rawainamo wanya anaerere ma jewen.

⁴ Sya arakove, weapamo maisyare wemai tavon, weye wakakai Kristus atavon no inyo kapite rai, weti Ananyao Musa mo wasaokaisy akatoe ramu. Yara soamo Kristus apaura wasai, Opi kovakato no wene rai to. Kristus apaura wasai indamu wapanapatambe Amisy ai.

⁵ Weramu arono wusyinoe Kristus apaura wansai rainyamo, wantavondi wansanasine ama bekero ngkakainoanive rai. Arono naije

anakotaro rui Ananyao Musa mo raorai indamu vemo wamo rave inya, wemirati wamo rave kobe. Weti ananyao umaso mi mbewar wama bekero ngkakainoanive ntubai ti nseowa manakoe. Naije wamo wansanasine veano ayao kakai rave, weti ama marane mammo mo wene raugavo wansai.

⁶ Weramu soamo Ananyao Musa mpaya wansai to ti mo wansaokokaisy akatoe ramu, weye wamamo maisyare wangkakai Kristus atavon. Arono wusyinoe Ananyao Musa mammo wamo rarijat mavabe, weramu unanuijo wanyine inta raneka wansai, omamo Anawayo Vambunin mo wansaugav indamu wamo Amisye arijat.

Ananyao Musa mbewar ti syo sya ayao kakai raen kakavimbe

⁷ Maisyare so, weamo Ananyao Musa mammo wamo rauranare rui? Indako Ananyao Musa mammo ngkove ramu rako? Indati jewen! Weramu Ananyao Musa wemirati mo ayao kakai raura ti syo raen kakavimbe. Maisyare so: Musa apa ananyao inta mare, “Vemo nanuga ntento vatano kaijinta apa anakotaro apaura rai jinya.”[✧] Weramu ranivara ananyao umaso mammo mewen datire, indati inanto taune sya bekero ngkakainoanive raije ramu. Weti ananyao so mo sya ayao kakaije raroron indamu syo raen.

⁸ Weye arono syo ananyao so raraniv mare, “Vemo nanuga ntento anakotare rai jinya,” naije ayao kakai ntipu inanuga so rai ti inanuga ntento anakotare rai kobe. Weramu ranivara ananyao

✧ 7:7 Keluaran 20:17; Ulangan 5:21

mewen, weamo ayao kakai ama vambunine mewen tavon.

⁹ Arono wusyinoe syo Ananyao Musa ama ine raen kobe jewen, syo rakarae syare inanuga so-mamo nsauman. Weramu arono inanto Ananyao Musa rai tugaive, naije ayao kakai ntipu inanuga so rai kobe,*

¹⁰ muno ama marane mammo mo wene raugavo rinai. Amisye po apa ananyao raugaje indamu mo kovo ngko dave raunande. Weramu syo rakanyoandi ti Apa ananyao mo kove raunande ramu, yara wene obo mirati mo raunande.

¹¹ Arono syo Ananyao Musa raraniv, ayao kakai mo varore rakani indamu mo inaponae, mo inaubaisy.

¹² Ananyao Musa mammo Amisye opi po raugaje, weti ama ananyao mammo ngko dave muno mamai dave.

¹³ Indako Amisye apa ananyao ngkove umaso mo wene raugavo rinai rako? Jewena! Yara taune risya ayao kakai omi mo wene raugav. Weye arono syo ananyao ngkove umaso ranaun, taune sya ayao kakai mo inaponae indamu mo inaubaisy. Weti ayao kakai ama mamune raen kakavimbe, muno Amisye apa ananyao ngkove mbewaramo wandaen ayao kakai mammo ngkakainoanive muno mamun dave!

Ribeker kove rai weramu kakai mbambunin tavon

* **7:9** Paulus po taune obo aura no so ramu, yara vatano mine vone so mansai tenambe.

14 Sya arakove, wamo raen Ananyao Musa omamo ngkov weye nori rati Anawayo Vambunine rai. Weramu risyamo vatano mayondi vayave pi risy, weye ayao kakai mo rinaijaro arove.

15 Syantatukambe animaisye mi mbewaro rinai ti ribeare so: Ribeker ribeto ana ngkove rai, weramu syo rave ramu; yara ana syo raura tantunawi wemirati syo rave kobe.

16 Weti ranivara sya ana syo raura tantunawi wemirati syo rave, indati syo raen syare, “O, tugae! Ananyao Musa ama ayaowe mammo ngko dave.”

17 Weti taune risyirati syo rave ramu, yara ayao kakai wemirati mo rave, ayao kakai namije ntuna inanuga so rai.

18 Weye syo raen ana ngkove inta no no rinai ramu; no no inanuga ngkakainoanive so rai ramu. Ribeker syo ana ngkove rave, weramu rimamaisye ramu.

19 Ranivara ribeker ibeto ana ngkove rai, weamo syo rave ramu. Muno ranivara syonae syo ana ngkakai ravei, omirati syo rave kobe.

20 Ranivara anakotaro ngkakaijo syonae rai wemirati syo rave, weamo risyirati syo ravea jeven, yara ayao kakai no no rinanuga rai wemi mo rave.

21 Maisyare wemai ti, anakotare so nande rinai tutir: Arono rui ribekero kove rai, weamo bekero ngkakainoanive ntipu no inanuga rai, ti kakaije omirati syo rave kobe.

22 Rinanuga raijamo inanayanambe Amisye apa ananyao rai.

²³ Weramu ana inta mbe marovave inanasine so rai, mo inauga ti ibeto ama bekero ngkakain-oanive rai. Weti sya ana syo ratantona rajamo syare ibeto Amisye apa ananyao rai rave, weramu ayao kakai mo inanasine so rajaro arove mare ibeto ama bekere rai.

²⁴⁻²⁵ Maisyare omaisy, ibeto Amisye apa ananyao rai no sya ana syo ratantona rai, weramu ibeto ayao kakai rai no inanasine so rai. Abo! Risyamo vatano kakai mo rinakepe pi risy! Are pirati indati de po inapaya inanasino mo inaunanto wene rajije so rajjo? Kove raura seo Amisye ai weye wama Amisy Yesus Kristus po inapaya rai to!

8

Vatano nanawirati Anawayo Vambunine mbe akarive mai

¹ Maisyare omai ti, soamo vatano wambe intabove Yesus Kristus ai wamamo Amisy po mangke raugaje wansai jakatoe ramu.

² Muno wambe intabove Yesus Kristus ai ti Anawayo Vambunine mo kove raunande indamu wansanuga nggwanyin, muno Ama vambunine mo wansapaya irati ayao kakai ama vambunine rai muno wene ama vambunine rai tavon.

³ Weramu Ananyao Musa mammo mo wansapaya irati ayao kakai ama vambunine rai kakai. Weye vatano mine so wansanuga mayondi ti wantavondi Ananyao Musa rai kobe jeben. Weti ayao kakai ama vambunine mammo Ananyao Musa mo rapinde kakai, weramu Amisy po rapinde tenambe to. Amisy po rajja tenambe arono Po

apa Kavo Yesus atutir de, anasine mo vatano mine wansamaisy, indamu Po ayao kakai ama vambunino mo wansajare randamisy.

⁴ Amisye po rave tai maisy indamu wamamo wamamai no Amune rai mamaisyo Ananyao Musa mo wansatuti dai rai. Weti soamo wantavondi wansanasine ama bekero ngkakai rai jakatoe ramu, yara wantavondi Anawayo Vambunine ama bekere obo rai.

⁵ Vatano utavondi mansanasine ama bekere rai, weamo bekere umaso obo mirati wo ratantona. Yara vatano utavondi Anawayo Vambunine ama bekere rai, weamo awa ana wo ratantona mamontuna irati Ama mbekere rai.

⁶ Vatano wo manasine ama bekero ngkakai obo ratantona onawamo indati mangke raugaje mai indamu ukakai. Yara vatano wo Anawayo Vambunine ama mbekere ratantona onawamo indati ujaisyo kovo sauman Amisye rai tawan.

⁷ Vatano utavondi manasine ama bekero ngkakai obo rai onawamo ube marovave Amisye ai. Wonayo Amisye apa ananyao rai muno ubeta rai kakai.

⁸ Maisyare omai ti, Amisye anayanambe mai jeben.

⁹ Weramu, sya arakove, weapamo wasanasine ama bekero ngkakai mbe akarive wasai jakatoe ramu, yara Amisye apa Anawayo Vambunine omi mbe akarive wasai, weye Omamo ntuna wasanuga rai. (Weramu wasaemen: vatano are pirati Anawayo Vambunin namirati Kristus po raunande ntuna anuga rai jeben, vatano napije ato siso Kristus apa kawasae matavone jeben.)

¹⁰ Ranivara Kristus tuna wansanuga rai tugaive, weamo wansanasine so indati ngkakai weye ayao kakai no irati rai, yara wansanawayo pamo kova nuge nuganui weye Amisyé po wansaveti wama-mai no Amune rai.

¹¹ Amisyé wépi po Yesus Kristus aijaseo kovakato no wene rai, weti ranivara Apa Anawayo Vambunine ntuna wansanuga rai, indati Opamo po kove raunande wansanasino kopa rai indamu wangkovakato no wene rai tavon, mamaisyó Apa Anawayo Vambunin no irati wansai Ama vambunine rai.

¹² Maisyare omai ti, sya arakove, kove mamó wambeta Amisyé apa bekere obo rai, yara vemo wantavondi wansanasine ama bekero ngkakai rai jinya.

¹³ Weye ranivara wantavondi wansanasine ama bekero ngkakai rai, wea indati mo weno nuge nuganui raugavo wansai. Weramu ranivara wamo Anawayo Vambunine rawain mo vambunine raugaje indamu wansakinavo wama ana wandave ti ngkakaije rai, wea indati wangkova nuge nuganui.

¹⁴ Vatan tenambe nanawirati Anawayo Amisyé mbe akarive mansai onawamo Amisyé apa arikainye waino mansai.

¹⁵ Arono Ananyao Musa mo wansaokaisy no wusyinoe, wamo Amisyé apa mangke rasyaniv. Weramu Anawayo Vambunin wemirati Amisyé po raunande wansai Omamo mo wansave arove jeven, weti wanjaniv akatoe ramu, weye Mo wansaijasea wamamo Amisyé apa arikainye waino

wansai. Weti wamo Amisye awain wamare: “In-jae! Reama Injaya pi Winy!”*

¹⁶ Muno Anawayo Vambunine mo raura wansai no wansanuga rai mare wamamo arikainyo Amisy nawirati wam.

¹⁷ Maisyare wemaisy indati wamaura irati kovo Amisye po ratayao Apa arikainye mansai rai, weti kovo Kristus apaura rai mammo wamaura rai tavon. Ranivara wantavondi wansiuri Kristus atavon, wea indati wantavondi wamaura Apa kovo ntiti rai tavon.

Wamo Amisye apa kovo makare ranyut weye mo siurijo mine so rakivan

¹⁸ Arono syo Amisye apa kovo ntiti ratan-tona, syo rataun syare siurijo nande wansai no mine somamo mangke ramu. Kovo ntiti namije mammo Amisye po rarorono wansai no nugo indati makare rai.

¹⁹ Soamo anakotaro Amisye po ranari tenambe no mine so mo masyoto namije ranyuto ndei, weye mbeke dave indamu Amisye po raroron kakavimbe are nawirati Apa arikainye waino mai.

²⁰ Weye mine so muno ama anakotaro ntuna ama uga rai tenambe mammo patimu Amisye ntami rai to, patimu umaso mare indati ama kove ntoa raumandi. Weramu anakotaro mine so taune ama mbekere ma jeben, yara Amisye dapatimu

* **8:15** Ayao “Injae” raura ayao Yahudi raijamo *Abba*, ama ine mamai kava. Yesus po Injayo Amisy awainamo *Abba* arono be sambayambe Ai (Markus 14:36). Raen tavon no Galatia 4:6.

tai mai to.† Weramu anakotaro ranari no mine so ranave Amisyeye amen,

²¹ muno mo Amisyeye apa masyote ranyut arono indati Po rapaya indamu ntami maug akatoe ramu. Masyoto naije indati anakotaro ranari tenambe ntavondi kovo ntiti Amisyeye po raugaje Apa arikainye maije matavon.

²² Arono wusyinoe mansanan ava unumeso wandaen mine so muno ama maere, ama inyoe, ama anakotaro ranari tenambe mamu maisyare moyov muno manonae weye ama siuri umawe mangke dave, maisyare wanya inta nsiuri arono ntuna ama arikainye ai.

²³ Muno Amisyeye apa kawasae wamamo wamoyov muno wamanonae tavon arono wana no mine so rai. Wamo Amisyeye apa kovo po raurairive ranyut. Soamo Po apa Anawayo Vambunine raugaje ntuna wansanuga rai, Omamo Amisyeye apa kovo manasyino po raugaje wansai mije, weti wamo Apa kovo makanande ranyut. Muno wamo Amisyeye apa masyote ranyut arono indati Po wansajasea wamamo Apa arikainye waino wansai muno Po wansanasine so ranigwan nggwanyin.

²⁴ Amisyeye po wansapaya wama ayao kakai rai to, ti soamo wansanave Amen wepi indati Po apa ana po raurairive tenambe raugaje wansai. Ranivara ana wansanave ramen omamo nandea wandaeno wansami rai to, weamo wansanave ramen akatoe ramu. Weye anakotaro wansanave ramembe mara nde nande wansaneme rai to,

† **8:20** Kejadian 3:17-19. Amisyeye dapatimu pare mine so ama kove raumandi weye aneno Adam muno Hawa yo ayao kakaije rave.

umba wamare wansanave animaisye ramen akato?

²⁵ Weramu ranivara wansanave ana wamo raeno wansamije rai rainyeye inta rai, indati wansatawandi mavabe wamo ranyut.

Anawayo Vambunine nsambayambe Amisy ai wansamarom

²⁶ Anawayo Vambunine mo wansaeranande arono wamayondi. Arono wamantatukambe wamare wansambayambeare rui, weamo Anawayo Vambunine taune nsambayambe to irati Amisy ai wansamarom. Weye Anawayo Vambunine raemeneno wansai ti Mo raura nanto Amisy ai, Ama ayao mammo vatane wamo raura kakai.

²⁷ Muno Amisye nanto Anawayo Vambunine ama mbekere rai kobe, weye Ama sambaya mo rave Amisye apa kawasae wansai omamo maimaisyo Amisye apa bekere rai vintabo. Muno Amisye po vatane wansanuga raen tenambe.

²⁸ Wandaen anakotaro nande wansai omamo Amisye wepi po ratayao tenambe. Po anakotaro ngkakai muno ngkove ratayao indamu mo kove raugavere vatano wamuinyo Aije wansai. Wamirati Po wansawainde maimaisyo Apa bekere rai.

²⁹ Weye wamamo Amisye po wansaeno wusyimbe to muno Po wansapatimu indamu wamo Apa Kavoye Yesu amaisy, wirati indamu wambe arakobe Yesu ai. Weti Yesu wepirati wama anui pije yara wamamo Apa rijat.

³⁰ Vatan tenambe nanawirati Amisye po mapatimu arono manasyinoe nawamo Po mawain utavondi Ai. Muno vatano nanawirati Po mawain utavondi Ai onawamo Po mansaveti umamai no

Amune rai. Muno vatano nanawirati Po maveti umamai no Amune rai onawamo Po kovo ntiti raunande mai.

Anakotaro nsosobe nande wansai, wambambunin weye Kristus muinyo wansai

³¹ Inya! Syare wamo anakotare umaso ratantona kobe! Amisye tuna wansautan, weti vatan inta po wansapinde kakai.

³² Amisye po taune apa Kavoyesus amavuge ramu, yara Po aunande inda kakaijowansai tenambe. Weti Amisye po apa Kavoyesus aunande tai maisy, wea indati Po anakotaro rui vayave raunande wansai jaje.

³³ Wamirati Amisye apa vatano po wansatayao, weti vatan inta bambunin da po ayao kakai rantutibe wansai no Amisye amune rai jewen. Weye Amisye taune po raura pare wamamo wamamai to.

³⁴ Muno vatan inta bambunin da po mangke rapatimugo wansai jewen. Weye Yesus Kristus opi kakaijowansai muno kovakato no wene rai soamo tuna no Ajayoy Amisy anem ngkove rai Apa kovo ntiti rautan indamu be marimbe payao wansai no Injayoy Amisy amune rai.

³⁵ Kristus muinyo wansai rave weti ana inta mo Apa muinye so ransopi kakai. Weti anakotaro rui vayave nande wansai, weamo Kristus muinyo wansai tutir. Weti ana nsosobe nande rako, wansiuri rako, vatane wo wansave tatugadi, marore po wansave, ananuge meweno wansai, anaiyundako kakai ndako nande wansai—anakotaro rui nande wansai, Kristus muinyo irati wansai tutir.

³⁶ Weti mamaisyo Ayao Amisye mo ratoe so rai, mare:

“Amisyo winy! Vatane manuga mamuno reansai weye reantavondi Nai.

Namane rinit ubeker wo reansaubaisy.

Reamaisyare maero domba auga da apa isyisye raotare amaisy.”[☆]

³⁷ Weramu anakotaro rui vayave nande wansai, wamo rapinde tenambe irati Kristus apa vambunine rai, Opi muinyo wansai.

³⁸⁻³⁹ Weye risyanave syare Amisye apa muinye mammo ana inta mo ransopi kakai. Weti wangkakai rako, wano tawan no mine so rai rako, naito Amisye dako, anawayo kakai ndako, vambunino rui vayave ndako, ana nande arono naiso muno ana nande arono nugo makare umu ndako, vambunino no no naumo warae muno vambunino no no min ate waraya ndako, anakotaro ranari rui vayave, indati inta mbambunin mo Amisye apa muinyo wansai ransopi kakai. Apa muinye somamo wama Amisy Yesus Kristus opi po rarorono wansai.

9

Paulus animaumbe apa arakovo Yahudi mansai weye wanui wanave Yesus aije ramu

¹ Sya ana syare syo raura naiso omamo ayao tugae. Weye risyamo Kristus apaura rinai, weti syayarurijabe ramu. Muno syo raura tugaive somamo Anawayo Vambunine no no inanuga rai mo raen.

[☆] **8:36** Mazmur 44:22

² Abo! Risyamo inanimaumbe ntapekano rianuga so rai rave! Weye syoyovo taune sya arakovo Yahudi mansai weye wonayo wanave Kristus aiji.

³ Ribeker indamu syo sya arakovo Yahudi mansaugav ude Kristus ai. Weti ranivara awa ayao kakai ama mangke mamu raugaje rinai ratire, weamo syo ranawan kai. Munu ranivara Kristus po inatugaro marambe indamu syo sya arakove so manigwan datire, weamo syo ranawan kai. Weye ribeke dave indamu sya arakovo Yahudi wanave Kristus ai.

⁴ Kawasae Yahudi wenawamo Amisye po apa kove raugaje mansai manui, no taiso: Wenawirati Amisye po maijasea indamu onawamo Apa arikainye waino mai. Wenawirati Amisye po apa kovo ntiti rarorono mai. Munu wenawirati Po urairije raokokaisyo mai munu Ananyao Musa raugaje mai. Po mansanyao indamu ube sambayambe Ai ti mamaisy, munu Apa urairijo po raurairive mai mamu manui.

⁵ Kawasae Yahudi wenawamo reama aneno wusyino Abraham munu Isak munu Yakob awa ajavi nanawije. Munu Kristus opamo avaki no awa susye rai arono be vatanbe de no mine so rai. Kristus opamo Amisy, opirati be akarive anakotare rai tenambe, weti wankangkamambe Aija nuge nuganui. Amin!

Vatano mavaki Abraham apa susye rai onawamo Amisye apaura mai tenambe jeben

⁶ Vatano Yahudi mavaki no susyo Israel onawamo Amisye apaura mansai tenambe jeben.

Weramu Amisye po apa urairijo po raurairive mansai omamo Po rapaya ramu.

⁷ Vatano mavaki Abraham apa susye rai onawamo Amisye po mansaen tenambe jewen, pare inta nawamo Abraham apa arikainyo tugae jewen. Maisyare Amisye po raura nanto irati Abraham ai no wusyinoe pare, “Indati nya kavo Isak napiso Syo atayao indamu winanto irati susyo idaurairive nai we rai.”✧

⁸ Ayao raura umaso ama ine no taiso: Abraham apa arikainyo po mavaki onawamo mato siso Amisye apa arikainyo tugae mai tenambe jewen.* Yara apa arikainyo mavaki mamaisyo Amisye apa urairi rai obo nawirati apa arikainyo tugae nanawije.

⁹ Weye Amisye apa urairi po raugaje Abraham ai no taiso: “Indati tumo makanande so syakare, weaveti nya anamu Sara mo arikainyo anya inta avaki.”✧

¹⁰ Amisye po vatane inta mapatimu indamu apaura mai, maisyare wandaen kakavimbe no taiso: Arono Ripka mo ama arikainyo tapume yavaki, Esau muno Yakob, aya aja pamo intabo, opirati Isak, reama aneno wusyine pije.

¹¹⁻¹² Weramu arono arikainyo tapume so yavaki rainy ti yo ayao kakai muno kove inta rave rainy, arono naije Amisye po arikainye so inta atayao to pare Po apa kove raugaje ai. Po raura nanto Ripka rai wusyimbe to arono mo ama arikainye

✧ **9:7** Kejadian 21:12 * **9:8** Abraham apa kavo Ismael muno apa kavo kaijinta (Kejadian 25:1) onawamo Amisye po raura pare mato siso Abraham apa susyo tugae rai jewen (Kejadian 21:9-12). ✧ **9:9** Kejadian 18:10, 14

yavaki rainy, pare, “Nya arikainyo avaki rijabe indati be akarive apa anuija ai.”✠ Amisye apa ayao umaso mo raroron kakavimbe Amisye po anakotare ratayao mamaisyo taune Apa bekere obo rai. Weti mbaro wansai no taiso: Amisye po vatane mawain mamaisyo awa ana udave ngkove raije ramu, yara Po mawain mamaisyo taune Apa bekere obo rai.

¹³ Maisyare Ayao Amisye mo ratoe mare: “Risyamo rimuinyo Yakob ai, yara syonayo Esau ai.”✠

¹⁴ Maisyare somaisy, vatane inta wo ratantona ware, “Amisye pamo apa ana po rapatimu mamaisy ramu.” Indati jewen! Yara Amisye apa ana dapatimu mamai dave.

¹⁵ Weye Amisye po raura Musa ai pare:

“Risyamo syo muinye raroron irati vatano rui pi ribeker syare rimuinyo ai.

Muno ribekobeo vatano rui pi ribeker syare ribekobeo ai.”✠

¹⁶ Weti Amisye po vatane inta mapatimu indamu Po apa kove raugaje mai. Muno vatane awa vambunine muno awa bekero wo ana raijare mamamaisy po ratore ramu, yara Po mapatimu mamaisyo taune anuga ngkovo mai rai.

¹⁷ Wansaemen tavon irati Amisye apa ayao po raura Firaon aije so rai pare: “Inya, Firaon! Risyirati syo naijaseo wimbe akarive indamu winaijamo Risyo sya vambunine raroron ti Sya tame manakoe no mine tename so rai.”✠

✠ **9:11-12** Kejadian 25:23 ✠ **9:13** Maleaki 1:2-3 ✠ **9:15** Keluaran 33:19 ✠ **9:17** Keluaran 9:16

¹⁸ Maisyare omaisy, Amisyey po rapatimu pare Po apa muinye raroron irati vatane inta mai, yara Po rapatimu pare Po vatano kaijinta manuga rakeke ti matu.

¹⁹ Weramu weapamo inta wapantatukambe ti wapare, “Ranivara Amisyey po vatane inta wansanuga rakeke ti matu maisyare Firaon amaisy, weamo wamamo wambambunin wamo Apa bekere rawatambe kakai. Weti veanimaibe Po wama ayao kakai rantutibe?!”

²⁰ Wakoe! Are nawirati weap?! Inya, vatan bayave weap, wapare wapo Amisyey anyao rako? Amisyey wepi po wansanari to, indati vemo wapo raura tai somai nora: “Amisyey, mbeanimaibe Nyo reansanari tai somaisy?”[☆]

²¹ Vatano po kopa ranari vabiuve, opamo apaura kopa rai weti po ranari taune apa bekere rai. Muno po kopa ranepate tavon mamai tenambe, umba po rapatimu pare po vabiu inta ranari ngko dave yara inta ranari mamai kobe jeven, omamo mamaisyo taune apa bekere rai.

²² Muno Amisyey maisyare omai tavon: Po anakotare rapatimu mamaisyo Apa bekere rai. Ranivara beker pare Po apa vambunine muno Apa mangke rarorono vatano ukakainoanive mai indamu Po maubaisy, weamo Apa varore mije. Weye onawamo mangke nuge nunganui mamaisyo awa ana udave ngkakai rai. Weramu soamo Amisyey atawandi mai vayave, Po apa mangke raugaje rainy.

²³ Amisyey atawandi weye beker pare Po apa kovo manakoe rarorono vatano nanawirati ae-

[☆] **9:20** Yesaya 29:16, 45:9

meno maije mai. Onawamo Amisye po matayao wusyimbe to indamu awaura Apa kovo ntiti mo mansanyut no munijo ntiti rai.

²⁴ Muno wamirati vatano Amisye po wansawain indamu Po apa kovo namije raugaje wansai. Po vatano Yahudi nake inta reansawain, muno Po vatano Yahudi jewene nake inta wawsawain.

²⁵ Maisyare Amisye po raura wusyinoe ti anawae Hosea po ratoe no taiso:

“Kawasaeyo nanawirati risyaura mai jewen,
indati Syo mawaino Sya kawasae.

Muno vatano inanuga no mai jewen,
indati Syo mawainamo Sya kawasae inanuga
no mai rave.”[☆]

²⁶ “Wusyinoe Amisye po raura pare,
‘Weapamo Sya kawasaeyo risyaura wasai jewen.’

Weramu indati Amisye pare,
‘Soamo Syo wasawainamo
Amisyo noa pitawabe Sya arikainye nawirati
weap.’”[☆]

Ayao umaso mammo mo vatano Yahudi jewene mansaura.

Vatano Yahudi wonae wanave Yesus Kristus aiji

²⁷ Muno anawae Yesaya po vatano Yahudi mansaura pare:

“Vatano mavaki susyo Israel rai onanawamo awa
wanui ratore kakai,
maisyare nayavo ntuna no mayano warave
ramaisy.

Onawamo wanui, weramu nake inta obo nawirati
Amisye indati po mapaya awa mangke rai.

28 Weye Amisyé indati pavave Po mangke rapa-
timu,

Po raugaje vatano mine so mansai kobe.”✠

29 Maisyare anawae Yesaya po Yahudi maura
nakato arono po ayao so raurairive wusyimbe to
pare:

“Abo! Wama susye randamisy bintabo,
maisyare munijo Sodom muno Gomora rau-
mandi kobe,
ranivara Amisyé, opi apa vambunine ntiti,
aemeno wansai java.

Weramu Amisyé po wansamayar ti wama nake
inta ta no.”✠

30 Weti sya ana syare syo raura mi som: Vatano
Yahudi jewene nawamo wo Amisyé akanije ramu
muno wantatukambe indamu umamai no Amune
rai. Weramu onawamo Amisyé po maveti uma-
mai no Amune rai weye wanave Ai.

31 Yara Yahudi onawamo ware wo Ananyao
Musa rarija dave inda umamai no Amisyé amune
rai. Weramu wo raitoa marudi.

32 Wo raitoa marudi weye wanave kobe
jewen. Yara wo rakarae ware awa ana udajaro
maneme rai wemirati mo maveti umamaisyó
Amisyé amune rai. Wonayo Kristus ai, wepirati
aurata irati oramo manakoe vatane awa kawi
rantukamo rai.

33 Maisyare Ayao Amisyé mo ratóe no wusyinoe
rai, Amisyé pare:

“Inya! Risyamo syo Vatan inta aijaseo be akarive
no munijo Yerusalem rai.

✠ 9:28 Yesaya 10:22-23 ✠ 9:29 Yesaya 1:9

Opamo aurata irati orame inta rai, wemirati vatane awa kawi rantukamo rai ti utatayaje no min.

Weramu vatano are nawirati wanave Ai onawamo manimaumbe jewen, yara manayanambe Apa kove rai.”†

10

¹ Sya arakove, inaemeno sya kawasae Yahudi mansai rave, sya bekero rinanuga somamo indamu Amisye po mansapaya awa ayao kakaije rai, weti ribe sambayambe Aijo mansai.

² Syo raen onawamo ubeke dave wo Amisye arijat. Weramu wo arijato tugaive omamo wo raen kobe ramu.

³ Ware ubeker utavondi taune awa unanuije so rai: ware wo Ananyao Musa rarijat indamu umamai no Amisye amune rai. Weramu wantatukambe Amisye apa unanuijo tugae Po ratayao indamu vatane umamai no Amune rai. Muno wonae utavondi Apa unanuije so raiji.

⁴ Weramu Ananyao Musa ama mbekere ndea mamai no Kristusa nui. Wirati vatan tenambe nanawirati wanave Kristus ai onawamo uma-maisyo Amisye amune rai.

Vatano wanave Kristus ai awa ayao kakai rapaya

⁵ Wusyinoe Musa po unanuije raroron indamu vatane umamai no Amisye amune rai, no taiso: “Vatano rui pirati po Ananyao Musa ama ayao

† 9:33 Yesaya 8:14, 28:16. Raen tavon no 1 Petrus 2:6-8. Yerusalem mamo vatano Yahudi awa munijo akoe mije, ama tame rawain tavonamo “Sion” weye ntami no Unato Sion rai.

rarijat tenambe tutir, opamo indati kova nuge nuganui.”✠

⁶⁻⁷ Weramu Musa apa ayao kaijinta mo raura mare vatane maveti umamaisyo Amisye amune rai weye wanave Ai. Apa ayao mi so:

“Vemo nyo raura nanuga rai maisyare somai nora nyare:

‘Are pirati indati seo no munijo ntiti?

Are pirati indati pasyo no munijo wene ama uga rai?’ ”✠

Musa apa ayao umaso ama ine no taiso: Wamare wamo Amisye apa kove rakani indamu Po wansapaya kakaije rai, weamo vemo wanse no munijo ntiti indamu wamo rakani nora, weye Kristus pamo paje wansai no mine so rai to. Muno vemo wamasya no wene ama uga rai nora, weye Kristus pamo kovakato no wene rai to indamu Po wansapaya ayao kakaije rai.

⁸ Weti Amisye apa kove mamo mararaijo wansai, maisyare Ayao Amisye mo raura nakato, mare:

“Amisye apa ayao mamo nde mararai wasai to.

Omamo no no wasawa rai muno no no wasanuga rai.”✠

Ayao anave so mirati ayao reamo ravovo vatan tenambe mansai:

⁹ Ranivara nyo Yesus aura kakavimbe nawa rai nyare Opirati Amisy, muno nyanave no no nanuga nyare Amisye po Yesus aijaseo kovakato no wene rai to, wea indati Amisye po napaya nya ayao kakaije ama mangke rai.

✠ **10:5** Imamat 18:5; Galatia 3:12 ✠ **10:6-7** Ulangan 30:12-13

✠ **10:8** Ulangan 30:14

¹⁰ Weye wamanave Yesus ai no wansanuga rai, weti Amisye pare wamamai no Amune rai. Muno wamanave Ai ti wamo aura kakavimbe wansawa rai, naije Amisye po wansapaya wama ayao kakai ama mangke rai.

¹¹ Maisyare Ayao Amisye mo raura mare, “Vatano are nawirati wanave Ai onawamo manimaumbe jeben, yara manayanambe Apa kove rai.”✠

¹² Muno Amisye apa kove umaso Po raugaje vatano Yahudi mansai muno vatano Yahudi jewene mansai kava, weye vatano Yahudi mansamuinyo vatano Yahudi jewene mansaije ramu. Amisye pamo intabo, Opamo vatan tenambe awa Amisy. Muno Opamo po apa kovo manakoe raugaje mawebe irati vatan tenambe nanawirati ube sambayambe wo awaine mansai.

¹³ Weye Ayao Amisye mo raura mare, “Are pirati po Amisy awain, opamo Amisye po apaya kakaije rai.”✠

¹⁴ Weti ranivara vatan inta po Ayao Kove ravovo mai rainy, weamo ana wo raranive ma mewena. Muno ranivara wo raranive ma mewena, weamo wanave Amisye ai kakai. Muno ranivara wanave Amisye ai rainy, weamo wo awaine kakai.

¹⁵ Wakoe! Ranivara vatane inta de po Ayao Kove ravovo mai jeben, wea umba indati? Kove mammo Amisye po vatan inta matutir indamu wo Ayao Kove ravov. Maisyare Ayao Amisye mo ratoe, mare, “Kove ngkov irati vatano ude wo Ayao Kovo Amisye raugave mansai!”✠

¹⁶ Weramu vatano Yahudi manuga rausiso Ayao Kove so rai ramu. Maisyare anawae Yesaya po

raura no wusyinoe pare, “Amisyo winy! Vatan inta panave ayao reamo raugave so rai jewen!”✠

17 Maisyare omai ti, wandaen: Vatane wanave arono wo Ayao Kove raraniv, muno wo raraniv arono vatane inta po Ayao Kovo Kristus ravovo mansai.

18 Weramu vemo wamo ratantona maisyare somai nora: “Vatano Yahudi wo Ayao Kove rarani dainy.” Yara syo raura syare wo ranaun to! Maisyare Ayao Amisye mo raura no taiso:

“Ayao wo ravove maneka manakoe no mine so rai tenambe to,
nto nanto no munije ama ruduke raito tenambe to.”✠

19 Muno vemo wamo ratantona maisyare somai nora: “Yahudi unanta ana wo raranive rai ramu.” Yara syo raura syare unanta rai to! Weye Musa po Amisye apa ayaowe so raura:

“Vatano Yahudi weap, indati Syo wasaveti wapanyanyube weye Syo sya muinye raro-rono vatano Yahudi jewene mansai.

Muno Syo wasaveti wapari rave weye Syo kove raugaje vatano wantatukambe Rinai nanawije mansai.”✠

20 Umba Yesaya po raura vambunimbe akato, po vatano Yahudi jewene maura pare:

“Amisye apa ayao mi so:

‘Vatano wo rinakani jewene wenanawamo soamo unande Rinai to.

Wo rinawaine jewen, weramu taune rinarorono mansai to.’ ”✠

✠ 10:16 Yesaya 53:1 ✠ 10:18 Mazmur 19:4 ✠ 10:19 Ulangan 32:21 ✠ 10:20 Yesaya 65:1

21 Weramu kawasaeyo Yahudi wonayo Amisy ai, weti Amisye po mansaura pare:
 “Nugoenta rave Syo vatane wato mawain ude Rinai,
 weramu makari matu muno ubeta Rinaije ramu.”✧

11

Amisye po vatano Yahudi inta matayao indamu apaura mansai

¹ Umba syo ranajo: “Indako Amisye po taune apa kawasae Yahudi mansamaugo marambe taune Ai to rako?” Weramu indati jeben! Weye wasaemen: taune risyamo vatano Yahudi inta pi risy. Abraham pamo sya anena pije, muno rinavaki no Benyamin apa susye rai.

² Syo raura nakato syare: Amisye pamo po apa kawasae mansamaugo marambe Aije ramu, nanawirati Po matayao amarom arono wusyinoe.✧ Inya! Wasaemen irati Ayao Amisye rai, wemi mo Elia aura arono Elia pariyo vatano Israel mansai weti po awa ana udave rantutibe seo Amisy ai pare,

³ “Amisyo winy, vatane wato wo Nya anawae maotar ti makanive to. Muno tewa oramo anakotare rameseo Naije rai mamo vatane wato wo randami to. Soamo ribuisy ibeto Nai, weramu indati ubeker indamu wo inaubai tavon!”✧

⁴ Amisye apa ayao po rasakinav akare Elia ai pare, “Winyamo ntuna mumuimbe jeben. Yara

✧ 10:21 Yesaya 65:2 ✧ 11:2 Mazmur 94:14 ✧ 11:3 1 Raja-raja 19:10, 14

Sya vatane awa wanuije nseo no ribuge kaururum nanawirati risyaura mansai. Vatano nanawije ubeaje yaro titi Baal rai ramu.”☆

⁵ Maisyare wemai tavon no nugo naiso: vatano Yahudi mamaun kavinta nanawirati Amisye apaura mansai. Wenawamo Amisye po matayao mamaisyo Apa kove rai.

⁶ Weramu Po matayao mamaisyo taune awa ana udaijare raije ramu. Weye ranivara awa ana udave ngkove mbewar ti Amisye po matayao ratire, wea indati mamaisyo Apa kove rai ramu. Yara tugae mamu Amisye taune apa kove omi mbewar ti Po matayao indamu apaura mansai.

⁷ Weti noare rui? Maisyare so: Vatano Yahudi wo unanuije rakani indamu manuga mamu mama no Amisye amune rai, weramu wo rakanija marudi, unanta rai jeben. Vatano Amisye po matayao obo nawirati unanta rai, yara vatano kaijinta onawamo makari matu Apa waine rai.

⁸ Maisyare Ayao Amisye mo raura mare:
 “Amisye po awa ana wo ratantona raveti ngkau-
 mudi,
 mansamije ntuba, muno mansamarikoame
 mpapakiri.
 Weti ndea unumeso unanta ayao tugae raije
 ramu.”☆

⁹ Muno Daud po raura tavon pare:
 “Amisyo winy, syare Nyo mangke raugaje irati
 vatano ukakainoanive mansai!
 Syare awa mangke nande mai papabe arono man-
 anibe

☆ **11:4** 1 Raja-raja 19:18
 Matius 13:14-15

☆ **11:8** Ulangan 29:4; Yesaya 29:10;

awa romane muno awa anaisyo kove rautan.
Indati awa mangke raurata irati aviri ntende mo
makep;
muno raurata irati syeane nsawa mai.

¹⁰ Syare Nyo awa ana wo ratantona ravera ngkau-
mudi
indamu wantatukambe ayao tugae rai.
Syare awa siuri mangke mpaya mansaije jewen,
yara awa mona ngkapapo raija nuge nu-
ganui.”☆

*Vatano Yahudi wonae ti Amisye po varore rau-
gaje vatano Yahudi jewene mai*

¹¹ Vatano Yahudi wanui wonae wanave Kristus
aiji, weti Amisye ponae mai kobe rako? Weramu
indati jewen! Arono vatano Yahudi makirive
Kristus ai, weamo Amisye po varore raugaje
vatano Yahudi jewene mansai indamu wanave
Kristus ai ti Po mapaya awa ayao kakai rai, wirati
indamu vatano Yahudi wananyanyube vatano
Yahudi jewene mansai.

¹² Maisyare omaisy, arono vatano Yahudi
wo Kristus awatambe, weamo mo Amisye apa
kove raugavo vatano Yahudi jewene mansai.
Wakoe! Ranivara vatano Yahudi taune usakinav
ti wanave Kristus ai, wea indati Amisye apa kove
nseo ti manakoe rave!

¹³ Vatano Yahudi jewene weap, soamo syare syo
raura wasai. Risyamo Amisye po inatutir indamu
syo ayao Yesus Kristus ravovo vatano Yahudi jew-
ene wasai. Apa anakero po raugaje rinai somamo
syo raura titive.

☆ **11:10** Mazmur 69:22-23, 35:8

¹⁴ Weye ribeker syare sya anakero no no vatano Yahudi jewene wapa yasyine rai mo sya arakovo Yahudi maveti wananyanyube wasai. Wirati syo sya arakovo Yahudi inta maugavere no Kristusa nui indamu Po mapaya awa ayao kakaije rai.

¹⁵ Arono Amisye po kawasae Yahudi matugaro marambe weye wanave jewen, omamo mo unsanda rausiso vatano kaijinta una no mine so mansai indamu Amisye po maugav wakare taune Ai. Maisyare omaisy, Amisye po Yahudi matugaro marambe so ama kove inta no rai, weti arono indati Amisye po Yahudi maugave ude usisa Ai jakato, naije ama kove miridi nseo. Wakoe! Amisye po Yahudi maugave usisa akato wemamo raurata irati vatane inta kovakato no wene ama uga rai!

¹⁶ Syare syo ananeneae inta raura: arono inyoe ama mane makauje rai,* mane inta mamoraunande Amisye ai indamu mbe rarorombe inyoe umaso mamoraunande Amisye apaura ama mane rai tenambe. Muno kaijinta mo ramai tavon: ranivara inyoe ama ruke mamoraunande Amisye apaura rai, weamo ama aneneme mamoraunande apaura rai tavon. Maisyare wemaisy, kawasae Yahudi awa aneno Abrahamama pe Isaka pe Yakoba pe onawamo Amisye apaura mansai, weti awa ajavi wo mampame wenanawamo Amisye apaura mansai tavon.

Inyo saitun nawaisye me anate me yaurata irati vatano Yahudi muno Yahudi jewene mansai

* **11:16** Ayao Yunani naiso ama ananeneae mo roti raura, ama ine mamaisyo ananeneae inyoe ama mane makauje raije rai.

17 Soamo syo ananeneae kaijinta raura: Inyo saitun ntubai no nawaisy omamo raurata irati vatano Yahudi mansai. Amisy po inyo saitun umaso ama aneneme inta rataota to, umba inyo saitun kaije, omi ntubai no anate rai, ama aneneme inta rataotar ti rantitiki inyo saitun umawe ama tuture rai jakato, umba ntubai kobe. Anenemo rantitiki omamo raurata irati vatano Yahudi jewene wasai, weye weatavondi wapaura kovo namirati Amisy po raugaje aneno Yahudi mansaije rai.

18 Weramu, vatano Yahudi jewene weap, vemo wasararin nora! Muno vemo wapo vatano Yahudi nanawirati Amisy po mamaugo marambe maisyare anenemo rataotare umawe mansaura tatugadi nora. Wasaemen: weapamo anenem bayave, muno aneme omirati mo anaisy raunanto wantainye mo raisye ramu, yara wantainye mo anaisy raunanto aneme mo raisy.

19 Weramu vatano Yahudi jewene inta wasararin dave, wapo ratantona wapare, “Reamirati Amisy anuga no reansai! Weye Po Yahudi inta mamauta maisyare anenemo ramauta wemaisy indamu reamo manigwan.”

20 Arakove, wapa ayao wato no rai tugae, weramu wasaemen: Vatano Yahudi umaso mamauta weye wanave jeben, yara arakove weasaugav akato weye wapanave. Weti vemo wasararin nora, yara wapo Amisy asyaniv, Opi po vatane inta maugav yara Po kaijinta mamauta.

21 Wasaemen: Amisy aemeno taune Apa kawasae Yahudi mansai jeben yara Po inta mamauta, maisyare inyo saitun ama anenemo

kakui umawe rataotar ti ramauta ramaisy. Weti ranivara Amisy po taune apa kawasae inta mamauta weye wanave jeben, indati ranivara vatano marane wapanave kobe jeben, weamo Po wasamauta tavon.

²² Weti wamo raen kakavimbe: Amisy pamo apa kove manakoe muno Apa mangke mpanyoan tavon. Amisy po mangke raugaje vatano Yahudi wonayo Aije mansai, yara Po apa kove raugaje irati vatano Yahudi jewene wasai. Muno ranivara wano tawan no Apa kove rai, Amisy anuga ngkovo wasai tutir. Weramu ranivara wano tawan rai jeben, wea indati Po wasamaugo marambe tavon!

²³ Muno ranivara vatano Yahudi usakinav indamu wanave kobe, indati Amisy po maugav akato. Weye Amisy bambunin po maugav akare.

²⁴ Vatano Yahudi jewene weap, Amisy po wasaugave wasisa Apa kawasae matavon, raurata irati inyo saitun no anate ama aneneme inta rataotar ti raugav rantitiki inyo saitun namirati ntubai no nawaisy rai jakato. Weapamo vatano Yahudi kakui jeben, weramu Amisy po wasaugave wasisa Apa kawasae matavon. Ranivara Amisy po Yahudi jewene wasaugave wasisa, weamo maweso Ai po taune apa kawasae Yahudi maugav akare. Omamo raurata irati aneneme raugav akare taune ama mote rai jakato.

Amisy bekobe vatan tenambe mine so mansai

²⁵ Sya arakovo Yahudi jewene weap, Amisy po wasaugav wasisa Apa kawasae matavon, weramu vemo wasararin wapare wapo anakotare raen tenambe wenora! Tugaeyamo, vatano Yahudi

nake inta makari matu ti wonae wanave Kristus aiji, weramu syare wapo Amisye apa bekero ngkokaibe so raen: Yahudi awa makari matu so indati no tawane ramu. Yara manya nava vatano Yahudi jewen nanawirati ude wanave Kristus aije awa wanuije ndea mamai to, naije umba Yahudi awa makari matu namije nsopi.

²⁶ Arono naije indati Amisye po vatano Israel tenam mapaya awa ayao kakaije rai, mamaisyo Ayao Amisye mo ratoe no wusyinoe rai, Amisye pare:

“Akarijo po ayao kakai rapaya indati tipu no Unato Sion,[†]

Po Israel[‡] maugav ti utavondi ayao mamun mine so rai jakatoe ramu.

²⁷ Weye Sya urairi syo raokaisyo mai nami so:

Syo awa ayao kakaije rapaya mai.”[§]

²⁸ Vatano Yahudi ube marovave Amisye ai weye wonayo Ayao Kovo Kristus rai. Wemirati ngkovo vatano Yahudi jewene wasai, weye soamo Amisye po Ayao Kove so raugaje wasai. Weramu Amisye anuga no Apa kawasae Yahudi po mapatimu mansai tutir, weye aemen Apa urairijo po raokaisyo awa aneno Abraham, Isak muno Yakob mansai rai.

²⁹ Weye arono Amisye po vatane mawainde muno Po kove raugaje mai, weamo Apa waine muno Apa kove umaso mamu no tawan tutir, yara Po raugavo mansaora ramu.

[†] **11:26** Munijo Yerusalem rawain tavonamo Unato Sion. [‡] **11:26** Ayao Yunani no naiso mare “Yakob.” Yakob apa tamo kaijinta mamu Israel, weti apa susyo po mampame mawainamo Israel, muno mawain tavonamo Yahudi. [§] **11:27** Yesaya 59:20-21

³⁰ Vatano Yahudi jewene weap, arono wusyinoe wepamo vatano wabeta Amisye aije jeben. Weramu arono Amisye apa kawasae Yahudi wonae ubeta Aiji, naije Po apa muinye raugaje wasai.

³¹ Soamo vatano Yahudi ubeta Amisye aije ramu, weti Apa muinye mamu Po rarorono Yahudi jewene wasai indamu masyoto makareye indati Po apa muinye raugaje Yahudi mansai jakato tavon.

³² Weye Amisye aneme mpaya vatan tenambe mansai indamu taune awa ayao kakai mo maokokae kobe, wirati indamu Po apa muinye rarorono mansai tenambe.

Kangkamambe Amisye ai

³³ Tugae, Amisye apa kove manakoe rave! Muno akari mba dave muno Apa ana po raene ntapekan dave! Amisye apa ana po rapatimu mamu ntiti rave, vatane unanta rai kakai. Muno Apa ana po rave mamu vatane ware wo ranyanyuti indamu wo raen, mamaisye ramu.

³⁴ Maisyare Ayao Amisye mo ratoe, mare:
 “Vatan inta nanto Amisye apa ana po ratantona rai jeben,
 Muno vatan inta po ananyao raugaje Ai jeben.”

³⁵ Amisye apaura anakotare rai tenambe,
 weti vatane wo ana inta raunanto Ai ti ware Po awa ranijane, omamo mamaisye ramu.”

³⁶ Weye anakotar tenambe mamu Amisye wepi po ranari vintabo, muno Po raijanande vintabo,

muno ama marane mamo makato Ai vintabo. Kangkamambe Aija nuge nuganui! Amin!

12

Weapo taune wasaunanta no Amisye ai

¹ Inya, sya arakove! Amisye apa muinye manakoe rave, weti risyare ibeker indamu weapo taune wasaunanta no Amisye ai, omamo raurata irati wapa anakotaro wapo rameseo Ai. Weti wapo wasanasine muno wasanuga ratayao terave Amisye ai indamu ana ngkakainoanive inta raen no wasai jewen weti Amisye anayanambe wasai. Wapa ana wapo rave so mirati wapa sambaya mamaisyo Ai.

² Vemo weatavondi mine so ama ananyao rai nora, muno vemo weataobombe vatano mine so awa ana wo rave rai nora. Yara wapo wasakari raneka Amisye ai indamu Po wapa ana wadatantona ranigwan nggwanyin indamu weapamo maisyare vatano gwanyin. Wea umba wapo Amisye apa bekere raen kakavimbe: Apa bekero ngko dave muno mamaisy omi mo anuga raveti ranayanambe.

³ Amisye po kove raugaje rinai indamu syo Apa ayao ravov, weti syo wasanyao taiso: Vemo wapo taune wasaijaseo titive taune wapa ana wapo ratantona rai nora. Yara syare vatane nanentabo wapa ana wapo ratantona mamaisy, wapo taune wasanuga rataun mamaisyo wapa anave Amisye po ratodi wasai to rai.

⁴ Syo ananeneae inta raura taiso: Wansanasine mamo ama anakotare manui, maisyare wansakari, wansajoe, wansaneme wemaisy.

Muno kotare inta ama anakere ramuinyo inta ama rai, maisyare wansajoe ama anakere ramuinyo wansaneme ama anakere rai. Weti wansanasine ama kotare manui, weramu wansanasine mamu intabo.

⁵Weti vatano wamanave Kristus aije wamamo wansaurata irati wansanasine umaso rai: Wamanui rave weramu wambe intabove no Kristus ai. Muno wamo wansaeranande vambinibe weye Kristus po wansanugande tenambe intabove irati anasine rai.

⁶Wama anakere mbe kotabe, mamaisyo kovo vambunino Amisye po raugaje vatan nanentabo wansai tutudi rai. Weti sya arakove, ranivara weapamo inta nya kovo vambunino Amisye po raugaje nai mamu nyo Apa ayao nde nai ravov, weamo syare nyo rajar mamaisyo nya anave Amisy ai rarijati.

⁷Muno ranivara nya anakero Amisye po raugaje nai mamu nyo vatane maeranande, weamo nyo maeranande kobe. Ranivara Amisye po anakero kurune raugaje nai indamu nyo Apa kawasae mansanyao, weamo nyo mansanyao mavabe.

⁸Ranivara Amisye po kovo vambunine raugaje nai indamu nyananyaube, weamo nyananyaube kobe. Ranivara Amisye po nawain indamu nyo nya ananuge muno nya doije ratodijo vatano awa ananuge meweno maije mai, weamo nyo raunande manakoeve mai. Ranivara Amisye po vambunine raugaje nai indamu wimbe akarive vatane mai, weamo nyo mansaugav kobe. Muno ranivara Amisye po anakere raugaje nai indamu nyo muinye raroron irati vatano kaijinta mai,

weamo nyo raijaro nanuga ranayanambe rautan.

Muinye

⁹ Arakove, syare wapo muinye rarorono vatane mai tugaive, yara vemo wamuinyo mai ndaradambe nora. Wapo anakotaro ngkakainoanive ratugaro marambe, yara wapo ana ngkove raijaro matuve.

¹⁰ Weapamo wabe arakobe no Kristus ai, weti syare wamuinyo wasai vambinibe maisyare anui, rijate umuinyo taune mansai no awa yavaruga ramaisy. Muno wapo wapa arakove mansaura titive.

¹¹ Wapo Amisye apa anakere raijaro panyoambe, yara vemo wapononae nora! Syare wapa mayare ntapekan muno wasanuga ntenami wapanapatambe Ai.

¹² Wasananibe weye wasanave Amisye amen. Wasatawandi siurije rai. Wapo sambaya raura seo Amisye ai tutir.

¹³ Syare wasaemeno wapa arakovo wanave Kristus aije mai nanawirati awa ananuge meweno mai ti wapo maeranande awa bekedaije rai. Arono vatano marane ude, wapo maugav usen no wapa yavar.

¹⁴ Syare wapo Amisye anajo indamu Po kove raugaje vatano wanakakaive wasai mansai. Tugae, wapo Apa kove ranajo indamu nde mansai, yara vemo wapanaamatambe mai nora.*

¹⁵ Arono vatane manuga ranayanambe, syare weatavondi wasanayanambe matavon. Arono vatane woyov, wapoyovo matavon.

* **12:14** Matius 5:44; Lukas 6:28; 1 Korintus 4:12-13

16 Syare wasaumano wasai vambinibe. Vemo wapare weapi titi rave vatano kaijinta makivan nora, yara syare watantuna vatano awa tame ntiti jewene matavon. Vemo wasararin nora!

17 Arono vatane mansanuga mamuno wasai, vemo wapo mamune rasakinavo mai nora. ✧ Yara wapo ana ngkove obo rave indamu mamai no vatan tenambe mansamune rai.

18 Vemo wapayaowi nora, yara wapo unanuije rakani indamu wasanuga nsaumano vatan tenambe mansai.

19 Sya arakovo rimuinyo wasai, vemo wapo mamune rasakinavo vatano wo wasave tatugadi mansai nora, yara wapo varore raugaje indamu Amisyey apa pariye ntende mai. Maisyare Ayao Amisyey mo ratoy no taiso: Amisyey pare, “Risye syo kakai rasakinavo vatano wo kakai rave mansai. Taune Sya varore mije, indati Syo awa mangke raugaje mai.” ✧

20 Syare wapa ana wapo rave mamoy maisyare Ayao Amisyey ama ananyao so rai:

“Ranivara nya marova maror, nyo anaisyey raurantoy po raisy,
muno awa ngkangkamandi, nyo mana raurantoy po ramanam.

Nyo rave tai maisyey, weamoy nya marova so indati samane apa ana po nave tatugadi rai.” ✧

21 Wety vemo wapo mamune rasakinavo vatano manuga mamuno wasaije may nora! Weyey ranivara wapo mamune rasakinavo may, weamoy ma-

✧ 12:17 Matius 5:39-44; 1 Tesalonika 5:15; 1 Petrus 3:9 ✧ 12:19 Ulangan 32:35 ✧ 12:20 Amsal 25:21-22

mune omi mo wasapinde to. Yara wapo kove rajaro wasai indamu wapo mamune rapinde.

13

Wabeta akari pemerinta mansai

¹ Syare vatane nanentabo beto akarijo pemerinta mansai tutudi. Weye pemerinta awa ube akarive omamo wo raugav bintabo no Amisy ai. Muno Amisy opirati po vatane mapatimu ube akarive.

² Wepirati po pemerinta atayao indamu be akarive wansai, weti vatano are nawirati wonae ubeta pemerinta ai, onawamo maisyare vatano wonae ubeta Amisy ai mansamaisy. Indati awa mangke maje mai.

³ Ranivara vatane apa ana dave mamamaisy, weamo pemerinta pa po asyaniv nora. Yara vatano awa udave ngkakainoanive onawirati wo asyaniv. Weti sya arakove, ranivara wabeke damu wapo pemerinta asyanive jeben, weamo wapo anakotaro ngkove bo rave, wea indati pemerinta kangkamambe wasai.

⁴ Weye akarijo pemerinta pamo Amisy po atutir indamu po wasaerande. Weramu ranivara wapa ana wadave ngkakai, weamo wapo pemerinta asyaniv weye apa vambunine no irati ai indamu po mangke raugaje wasai. Muno tungaeyamo Amisy po pemerinta atutir indamu po mangke Amisy raugaje vatano wo anakotaro ngkakai rave mansai.

⁵ Maisyare omai ti, wabeta pemerinta ai indamu vemo mangke Amisy ntende wasai jinta. Muno

wabeta ai indamu mamaisyo Amisy apa bekere rai.

⁶ Muno wemi mbewar ti wapo pajak ravae nanto pemerinta ai tavon. Wapo ravae indamu vatano pemerinta wo awa anakere raijar, nami-rati Amisy po raugaje indamu wo ranawan.

⁷ Maisyare omai ti, pajak dako, romano doi rako, ana rui pemerinta po ranajo indamu wapo ravae, weamo wapo ravae kobe.✧ Muno vatano rui vayave ube akarive wasai, syare wabeta mai muno wapo mansaura titive.

Wamuiny irati vatan tenambe mansai, weye Kristus pakare mararai to

⁸ Arono wapo doije inta ranajo wapo rauga no vatane inta ai, weamo wapavave wapo apa ravae akananto. Weramu syare wapo raijar tutiro wasai mi som: muinye, wemirati syare wapo rarorono wasai vambinibe. Weye are pirati po muinye rarorono vatan tenambe mai, opamo beto Anyayao Musa rai vintabo to.✧

⁹ Anyayao Musa mare: vemo nyo anaerere rave inya, vemo nyo vatane mao inya, vemo nyanaonoambe inya, vemo nanuga ntento vatano kaijinta apa anakotaro apaura raije rai jinya. Anyayao tenambe so muno anyayao Amisy kai rui tavon ranugande ratoe intabove so mare: “Muiny irati nya arakove mansai maisyare muno taune wimuinyo taune nai wemaisy.”✧

✧ **13:7** Matius 22:17-21; Markus 12:14-17; Lukas 20:22-25 ✧ **13:8** Matius 22:37-40 ✧ **13:9** Keluaran 20:13-17; Imamat 19:18; Ulangan 5:17-21; Matius 22:39

¹⁰ Vatano are pirati muinyo apa arakova ai opamo po kakai rave ai ramu. Weti vatano muinyo opamo beto Amisy e apa ananyao rai tenambe to.

¹¹ Arakove, syare wapo muinye raroron arono naiso weye ama varore indati mare nsopi. Arono wusyin wamanave Kristus aijoe, Apa masyoto pakare raije mamu nggwaravainy, yara naiso Apa pakare mamu mararai kobe to. Weti wade wambesea indamu wamu ana ngkove rarijat.

¹² Namane ndentoa kavinta raumandi, sansimane mare ntipu kobe. Weti wamu wama ana wandave ngkakai ravea nsopi, weye anakotaro ngkakai mamu namane amaura rai. Yara wana varo sansimane rai weti wade wamanatatayaube, maisyare naite wo awa anaiyu ratayao indamu usisa marova rai.

¹³ Syare wamu ana ngkove obo raijar, indamu mamaisyo vatano wanya varo sansimane rai mansamaisy. Arono wapo one rave, vemu wamaeno awije rai nora. Vemu wapo anaerere rave nora muno wapo anakotaro nggwambe rave nora. Vemu wapayaowi nora muno wasanuga mparijo vatane mansai nora.

¹⁴ Syare wapa ana wadave mo Amisy Yesus Kristus apa ramaisy. Muno vemu wapo unanui rakani indamu watavondi wapa bekerō ngkakainoanive rai nora.

14

Ranivara nya arakova apa koano po rarijate nsasye irati nya ana nyo rarijate rai, vemu nyo aura tatugadi nora

¹ Ranivara wapa arakove inta apa anave mayondi, weamo syare wapo augave siso wasatavon, vemo wapo awatambe nora. Muno vemo wapayaowi ai nora, vemo wapare, “Nya ana nyo ratantona mamaisye ramu,” wenora.

² Vatano nanawirati awa anave ntindimu wo raura ware, “Anaisye kotaro rui vayave wamo rai kai.” Weramu vatano nanawirati awa anave mayondi ware, “Maere ama ine mamamaisyisyi, weti syo anawao obo raisy.”

³ Vemo vatano po maere ama ine raisy po vatano po raisye ramu aura tatugadi nora. Muno vemo vatano po maere ama ine raisye ramu po vatano po raisye aura tantunawi nora. Weye Amisye anuga rausiso Po yaugav tenambe to.

⁴ Onayamo vatano yanapatambe Ai kava. Weti are nawirati weap?! Wabeanimaibe wapo Amisye apa vatano panapatambe Aije inta aura tantunawi? Amisye wepi be akarive ai, weti Po apa ana po rave raen pare mamai dako jeben dako. Taune Apa varore mije, yara wapa ma jewena! Weti ranivara wapa arakove inta apa anave mayondi, indati Amisye po vambunine raugaje ai indamu po ana mamaisye rave.

⁵ Vatan inta wo masyote inta rapatimu ware omamo masyoto akoe ma, yara vatano kaijinta ware masyote inta ramuinyo masyoto kaijinta raije ramu, yara mamai tenambe. Syo ananyao so raugaje wasai: Ngko to! Vatan nanentabo nyo rapatimu nanuga rai!

⁶ Weye vatano napi po masyote inta rapatimu pare masyoto akoe ma, po rave indamu po Amisye aura titive rai. Vatano po maere ama ine raisy,

opamo po rave Amisyé ai tavon, weye po kove raura seo Amisyé aijo rai wusyimbe to. Muno vatano po maere ama ine raisye jeben, opamo po rave Amisyé ai tavon muno po kove raura seo Amisyé ai wusyimbe tavon to.

⁷⁻⁸ Arakove, wangkov no mine somamo indamu wamo taune wama bekere obo rarijat omamo jeben. Yara wangkov no mine so indamu wamo anayanambe raugavo Amisyé ai. Muno wangkakai mamó maisyare wemai tavon. Weti wangko dako wangkakai rako, wamamo Amisyé apaura wansai vintabo.

⁹ Wemi mbewar Kristus kakai muno kovakato no wene rai to, indamu Opirati Amisyo be akarive vatano nanawirati ugwenen to muno vatano nanawirati ujai ti utantunana nene mansai tenambe.

¹⁰ Weti sya arakove, weapamo wapanave Kristus ai kava, weti wabeanimaibe inta wapo wapa arakove maura tantunawi muno wapo awa ana udave rapatimu wapare ngkove ramu? Wabeanimaibe wabeare so? Wasaemen: masyoto makareye wan tenambe wansayai no Amisyé amun indamu Po wansanajo wama ana wandave ngkakai muno ngkove rai.

¹¹ Maisyare Ayao Amisyé mo ratoe mi som: Amisyé pare,

“Tugae rave, Sya ana syo raurairive so mare nande:

Indati vatan nanentabo ubeaje no Rinamun,
wo raura kakavimbe ware Ribui syirati
Amisy.”✧

✧ 14:11 Yesaya 45:23

¹² Indati wamamo nanentabo po taune apa ana po rave ranawan po raura kakavimbe no Amisy amune rai.

Vemo ana wapo rave inta mo arakove augavo ayao kakai raron nora

¹³ Maisyare omai ti, vemo wapo wasaura tantunawi vambinibe akato inya, yara wapo wasaurana nsopi! Syare wapo raura patimuve no wasanuga rai indamu vemo ana wapo rave inta mo wapa arakove inta augavo ayao kakai raron nora.

¹⁴ Risyamo ibe intabove Amisy Yesu ai, weti syo raen anaisy e inta raisyisyi j ewen. Weramu ranivara vatan inta po ratantona no anuga rai pare, “Anaisy e inta mam o raisyisyi,” weamo vemo po rai nora. Anakotaro rui mirati po rakarae pare anaonae ma, weamo anakotaro namije po raisyisyi ai.

¹⁵ Weramu syare naemeno nya arakove wato ai. Weye ranivara nya arakove po naen nyo apa anaisy o po raisyisyi raisy, weamo anuga nsosobe. Nya arakove umaso pamo Kristus kakai ai to, weti vemo nya ana nyo raisy e mo nya arakova apa anave randami nora! Yara syare naemeno ai, ti kove mam o nyo anaisy e wato rai nora.

¹⁶ Ranivara nya ana ndaura nyare kovo maimaisy inta mo nya arakove anuga ransosobe, weamo kove mam o nyo rapaya vayave indamu vemo nya arakove po naura tantunawi nora.

¹⁷ Weye arono Amisy e be akarive wansai, weamo koano anaisy e muno koano mana mbe mobe j ewen. Yara ana mbe mobe mam o wama-mai no Amisy e amune rai, wansaumano wansai

vambinibe, muno wansananibe weye Anawayo Vambunine no no wansanuga rai.

¹⁸ Weye are pirati tavondi Kristus ai tai maisy, opamo po anayanambe raugavo Amisy e anuga rai muno vatane wo aura titive.

¹⁹ Weti wade wamo unanuije rakani indamu wansanuga nsaumano wansai vambinibe. Muno wamo wansaeranande vambinibe indamu wansanuga mbambunin.

²⁰ Tugae, anaisy e mam o inta mbe anaonaeve akatoe ramu. Weramu syare wasaemeno wapa arakovo wepi po anaisy e inta raisyisyije ai. Ranivara wapa arakovo napije po wasaen wapo apa anaona e raisy umba mo auga ti po ayao kakai rave, weamo ngkove ramu. Vemo wapo anaisy e wato rai nora! Indamu vemo wapo Amisy e apa anakero ngkove no wapa arakove anuga rai rangkat nora!

²¹ Weti ranivara wapa arakova apa anave mayondi tai maisy, kove mam o wapo maere ama ine raisy e jwen kai muno wapo angguri ramaname jwen kai. Muno anakotaro rui vayave mo wapa arakove augavo ayao kakai raron, vemo wapo rave nora.

²² Sya arakovo wapanave Kristus aije weap, syare syo raura kakavimbe wasaije so: Anakotaro maisyare maere ama ine rai dako jwen ndako, omamo anakotaro mamaun bayave. Syare vatan nanentabo nya ana nyanave anakotare so rai mam o nyo raokaisy o Amisy e obo ai. Weti ranivara vatan inta panave pare apa ana po rave mam o ayao kakai ma jwen, weamo anayanambe. Anayanambe weye apa ana dave

ntavondi apa anave rai.

²³ Weramu ranivara vatane inta anuga ma-
maun ti po rakaraebe pare, “Anaisyee somamo
raisisyi rako? Syo rai kai rako?” umba po rai
kobe, weamo ngkove ramu. Omamo ayao kakaije
ma, weye apa ana po rave mo apa anave rarijate
ramu. Muno anakotaro rui vayave no no anave
rai jewen omamo ayao kakaije ma.

15

*Vemo wapo taune wapa anayanambe rakani
nora, yara wapo wapa arakove maeranande*

¹ Inya, sya arakove! Ranivara wama anave
mbambunin, koveamo wamo vatano apa anave
mayondi aeranande, muno wansatawandi
ai mavabe. Vemo wamo taune wama
wansanayanambe obo rakani nora.

² Syare vatan nanentabo wamo wama arakove
aveti anayanambe, muno wamo aeranande in-
damu apa anave mbambunin.

³ Syare wama ana wandave mo Kristus apa
ramaisy. Opamo po taune apa anayanambe
rakanije ramu. Maisyare Ayao Amisyee mo Kristus
aura no wusyinoe no taiso: “Vatano wo Amisyee
aura tantunawi, onawamo wo rinaura tantunawi
tavon.”[✧]

⁴ Ayao Amisyee ama mo ratoe tenambe mamu
indamu mo wansanyao. Apa Ayao mo wansanyao
indamu wansatawandi muno wansanuga mbam-
bunin, wirati wansanaveano Amisyee amen.

⁵ Wepirati po kove raugaje indamu
wansatawandi muno wansanuga mbambunin.

✧ 15:3 Mazmur 69:9

Ribe sambayambe Ai indamu Po wasauga ti wasaumano wasai vambinibe, mamaisyo Yesus Kristus apa bekere rai.

⁶ Wirati wea tenambe wasanuga intabove wakangkamambe Amisye ai, wepirati wama Amisy Yesus Kristus apa Aja pije.

Amisye po Ayao Kove raugaje vatano Yahudi jewene mansai

⁷ Syare wasanuga rausiso indamu wapo wapa arakove maugav usisa wasatavon, maisyare muno Kristus anuga rausiso wasai ti Po wasauga wasisa to. Syare wasanuga rausiso wasai vambinibe indamu vatane wo wasaen ti wo Amisye ararimbe.

⁸ Syare wasaemen Kristus de po vatano Yahudi mansaeranande indamu Po raroron kakavimbe: Amisye pamo teto Apa urairije rai. Apa urairije mamu Po raokokaisyo Yahudi awa anene mansai no wusyinoe.

⁹ Muno Kristus de tavon indamu vatano Yahudi jewene nao wo Amisye ararimbe weye Po kove rarorono mai. Maisyare Ayao Amisye mo ratoo mare:

“Amisyo winy, risy kangkamambe Nai

no vatano Yahudi jewene awa yasyine rai.

Rikinyo ansyerane rai indamu syo Nya tame rararimbe.”✠

¹⁰ Muno Ayao Amisye mo raura nakato mare:

“Vatano Yahudi jewene wade!

Wasananibe Amisye apa kawasae matavon.”✠

¹¹ Muno Ayao Amisye ama anemo kaijinta mare:

✠ 15:9 2 Samuel 22:50; Mazmur 18:49 ✠ 15:10 Ulangan 32:43

“Vatano Yahudi jewene wade tenambe,
 wakangkamambe Amisye ai!
 Vatan tenambe wade wapo Amisye ararimbe!”☆

¹² Munu anawae Yesaya po ratoe tavon pare:
 “Indati Vatane inta tipu no Isai apa susye rai*
 indamu be akarive vatano Yahudi jewene
 mansai,
 munu Webo ai, mansanaveano Amen.”☆

¹³ Amisye pamo wansanaveano Amen. Risam-
 bayambe Ai syare Po wasauga ti wasananibe
 rave munu Apa saumane ntairijo wasanuga rai
 weye wapanave Ai. Munu syare Anawayo Vam-
 bunine mo vambunine raugaje wasai indamu
 wasanaveano Amisye amene manakoe nseo kobe.

Paulus apa anakero po raijaro Amisye ai

¹⁴ Sya arakove, syo wasaen wapa ana wadave
 ngkove mamu manui rave. Munu syo wasaen
 wananta Amisye apa ayao rai ntapekan, weti
 wapo wasanyao rai vambinibe indamu wasanuga
 mbambunin.

¹⁵ Nyovara wao somamo syo ratoe tindimuve
 wasai weye ribeker wasaemen sya ayaowe rai.
 Weye Amisye po kove raugaje rinai,

¹⁶ Po inatutiro Yesus Kristus apa anakere
 rai indamu syo Ayao Kovo Amisye ravovo
 vatano Yahudi jewene wasai. Sya anakere
 somamo raurata syene awa anakere rai. Syene
 wo anakotare rameseo Amisye ai, yara risyo
 weasugav syo wasaunanta Amisye ai. Weti
 Amisye anayanambe wasai weye Anawayo

☆ **15:11** Mazmur 117:1 * **15:12** Isai opamo Daud apa ajaya pije.
 Vatano tipu no susyo Isai raije so pirati Yesus Kristus. ☆ **15:12**
 Yesaya 11:10

Vambunine mo wasanuga ratayao ngkakavimbe to.

¹⁷ Risyamo ibe intabove Yesus Kristus ai, weti inanayanambe rikangkamambe sya anakero syo raijaro Amisyae aije rai.

¹⁸ Apa anakero syo raijar no vatano Yahudi jewene awa yasyine obo mirati syo raura titive. Weye Kristus po vambunine raugaje rinai indamu syo vatano Yahudi jewene maugavere ubeta Ai. Ubeta Ai weye wo sya ayaowe raraniv muno wo sya ana idave raen.

¹⁹ Weye Anawayo Vambunine mo vambunine raugaje rinai indamu syo anapaporainye muno anainame rarorono mai. Weti syo Ayao Kovo Yesus Kristus ravovo tenambe to, syo raija kobe no munijo Yerusalem mansanan nanto no propinsijo Ilirikum.

²⁰ Sya bekere mammo syoroto no munijo maran indamu syo Ayao Kove ravovo vatano nanawirati wo ranaun dainye mansai. Weramu ranivara kuruno kaijinta wo Ayao Kove ravovo no munije inta rai to, weamo risyamo syare syo ravovo no naije akatoe ramu, weye syonae syo anakere rampamo vatano kai awa ma vone raiji.

²¹ Weti syo Ayao Kove ravovo vatano wo rarani dainye mansai indamu mamaisyao Ayao Amisyae mo ratoe so rai, mare:

“Vatano nanawirati Apa ayao ravovo mai rainy,
indati wo raen kakavimbe.

Muno vatano wo Apa ayao rarani dainy,
indati unanta rai kobe.”✧

✧ 15:21 Yesaya 52:15

Paulus pare beker po arakovo una no munijo Roma mapan

²² Nugoenta rave syare syoroto syo wasapan no munijo Roma, weramu sya anakere mo rinao-raive syoroto rai.✧

²³ Weramu soamo sya anakero no no munije so mewen to. Tume kakai ribeker syo wasapan, weti

²⁴ syare syo rajiore mi wato syo wasapan. Syo wasapana jewen, umba syoroto no propinsijo Spanyol. Syare wansanayanambe tenambe masyote kavinta yai, umbawe syare wapo inaeranande sya unanui anya rai tutir ito no Spanyol.

²⁵ Weramu wabaya rati vavai, weye soamo syare syoroto no Yerusalem indamu syo Amisy apa kawasae una no naije maeranande rati.

²⁶ Soamo syo doije inta raugav syo raunanto arakovo Yerusalem nanawirati awa ananuge meweno maije mai. Doijo syo rauga somamo vatano Yahudi jewene una no Anugano Amisy Makedonia muno Akaya onawirati wo raunande, weye maemeno awa arakovo Yerusalem mansai, ti wo raura patimuve indamu wo doije ranunugambe mai.✧

²⁷ Muno wo raunande manuga ranayanambe rautan. Wo awa arakove umaso maeranande omamo mamaisy, weye arono manasyinoe vatano Yahudi wenawirati wo Ayao Kovo Kristus raura nanto vatano Yahudi jewene mansai. Weti ranivara vatano Yahudi jewene wo awa arakovo Yahudi maeranande akato, weamo mamaisy, raurata irati wo kove raugakare mai. Weye soamo

✧ **15:22** Roma 1:13 ✧ **15:26** 1 Korintus 16:1-4; 2 Korintus 8:1-4, 9:1-2

vatano Yahudi jewene usisa Amisye apa kovo po raugaje Yahudi maije rai tavon to.

²⁸Weti manasyimbe syare syo doijo ranugane so raunanto arakovo Yerusalem mansai. Arono syo rajjara mewen to, indati syare syo wasapan no Roma, umba sya unanui anya rave ito kobe no Spanyol.

²⁹Arono syore wasai, syo raen Kristus indati po kovo manakoe inta raugaje indamu syo raunande wasai jakato.

³⁰Sya arakove, Yesus Kristus no no wansanuga rai muno apa Anawayo Vambunine mo wansauga ti wamuinyo vambinibe, weti ribeke dave indamu watawondi rinai kobe ti wamo sambaya rave Amisye aijo rinai.

³¹Syare wapo Amisye anajo indamu Po rinaorai jirati vatano wanave jewen una no Yudea mansai. Muno wapo Amisye anajo indamu arono syo doijo ranugane so raunanto arakovo Yerusalem mansai, onawamo wo raugav manayanambe rautan.

³²Muno wapo sambaya raura seo Amisye ai indamu ranivara Po rinamayar, indati syore wasai, inanuga ranayanambe rautan. Muno arono rino wasarijat, indati rinanuga rajjaseo mbambunin akato.

³³Syare Amisye tuna wasautan tenambe, Wepirati po kovo saumane raugaje wasanuga rai. Amin!

16

Paulus po kove ranutu terave apa arakovo una no Roma mansai

¹ Arakove, syare syo wama arakovo wanya inta rarorono wasai, ama tame mirati Febe. Omamo mo anugano Amisy no munijo Kengkrea maeranande.

² Wanya somamo wama arakovo wamanave Amisy Yesus ai kava, weti syare wasanuga rausiso rai mamaisyo vatano wanave Yesus ai awa anaube ramaisy. Ranivara ama ana inta meweno rai ti mo ranajo wasai, syare wapo raunanto rai, weye wanya so mo vatane wanui maeranande muno ri tavon mo rinaeranande to.

³ Syo sya kove ranutugore Prsikila muno Akwila yai, ✧ onayamo sya arakovo wamo anakero Yesus Kristus rajia kava.

⁴ Sya arakove sonayamo kavintare igweneno inai indamu yo inavijuri kakaije rai. Weti syo kove raura nanto yai weye yo inapaya kakai rai to, muno vatan tenambe una no anugano Amisy no munijo Yahudi jewene utavondi wo kove raura nanto yai tavon.

⁵ Muno syo kove ranutu tavon irati Amisye apa kawasae nanawirati wanugan ube sambayambe no aya yavare rai.

Syo kove ranutu Epenetus ai, opirati sya arakovo inanuga no ai rave. Opamo vatano manasyin dave panave Yesus Kristus ai no propinsi Asia.

⁶ Syo kove ranutu tavono Maria rai, omamo mo anakere rajia panyoambe wasai to.

⁷ Muno syo kove ranutu irati Andronikus muno Yunias yai, onayamo sya arakovo Yahudi inta

✧ 16:3 Arakov 18:2, 18, 26; 2 Timotius 4:19; 1 Korintus 16:19

nanaije. Onayamo arono wusyinoe reamakova tenambe tanoano makova inta rai. Onayamo arakovo Yesus po matutire inta nanaije, aya anakere mamu vatan tenambe wo raura titive. Arono risya syanave Kristus ai rainy, onayamo yanave wusyimbe to.

⁸ Syo kove raura tavono Ampiliatus ai, risyamo muinyo ai rave weye ririmbe intabove Amisy Yesus ai.

⁹ Munu syo kove raura Urbanus ai, opamo wama arakovo wamo anakero Kristus rajia kava. Munu kove raura tavon irati Estakis ai, opamo inanuga no ai rave.

¹⁰ Kove raura Apeles ai, opamo vatano apa beto Kristus aije raen kakavimbe. Kove raura tavono Aristobulus apa yavaruga mansai tenambe.

¹¹ Kove raura Herodion ai, opamo sya arakovo Yahudi inta pije. Kove raura tavon irati arakovo wanave Kristus ai no Narkisus apa yavaruga mansai.

¹² Risyo kove raura Tripena me Triposa me yai. Wanya jirume so yo anakero Amisy Yesus rajiaro panyoambe. Munu kove raura tavon irati Persisa rai, wemirati sya arakovo inanuga no rai munu omamo mo anakero Amisy Yesus rajiaro panyoambe tavon.

¹³ Kove raura Rupusa pe[☆] apa akoya me yai. Rupusa pamo vatano Amisy Yesus po atayao terave Ai. Munu akoya mamu maisyare taune risya ingkoa mije weye mo rinaeranande rave.

¹⁴ Kove raura tavon irati arakovo Asingkiritus, Peregion, Ermes, Paterobas, Ermas, munu arakovo

☆ **16:13** Markus 15:21

utantuna matavon tenambe mansai.

¹⁵ Kove raura arakovo Pirorogus muno Yulia muno Orimpas, Nereus muno apa anama, muno Amisy apa kawasae utantuna matavon tenambe mansai.

¹⁶ Wapo kove raura wasai vambinibe weye wabe arakobe no Yesus Kristus ai. Anugano Amisy Kristus tenambe wo kove ranutugore wasai.

Ananyao maran

¹⁷ Sya arakove, syo ananyao so raugaje wasai: Wasyisyaube vatano wayaowi ti wapa anugane mporadi mansai! Wo wasaveti wapananepabe wapa anave rai, weye awa ananyao nsasye irati ananyao tugae wapo raugav nsiso wasanuga rai to rai. Weti wagwaravainyo vatane wato mansai!

¹⁸ Weye vatano maisyare so wo wama Amisy Kristus apa anakere rajare jeben, yara taune manasine ama bekere omirati wo rarijat. Mansawa nsiridi ayao rai muno awa ayao manavan, weti wo vatano wantatukambe maponae.

¹⁹ Weramu vatan tenambe wo wasaen weapamo wabeto Kristus ai, weti inanayanambe wasai. Ribeker wasakarikuga mbaro anakotaro ngkove rai, weramu anakotaro ngkakainoanive mamu syare meweno wasai.

²⁰ Amisy, opi po kovo saumane raugaje vatane mai, indati pavave Po Anakakai Akoe apinde muno apa vambunino mo wasajare randamisy indamu wapo atekar asyo no wasajo ate rai.

Syare wama Amisy Yesus apa kove no wasautan tenambe.

²¹ Timotius, wepirati sya arakovo irimo anakero Kristus raija kava, po kove ranutugore wasai. Umba Lukiusa pe Yasona pe Sosipatera pe wo kove raura wasai tavon, onawamo sya arakovo Yahudi inta nanawije.

²² Muno risy Tertius syare syo sya kove raura wasai tavon, weye wambe arakobe no Amisy Yesus ai. Risyirati syo Paulus apa ayaowe ratoe nyovara waowe so rai.

²³ Gayus po kove ranutugore wasai, opirati po Paulus rinaugav rinikijo arijat no apa yavar, muno apa yavare mi anugano Amisye ube sambayambe rai. Erastus, wepirati po munijo Korintus so ama doije randi, po kove ranutu wasai. Muno arakovo Kwartus tavondi po kove raura wasai tavon.

²⁴ Syare wama Amisy Yesus Kristus apa kove no wasautan tenambe. Amin!

Nyovara waowe ama maran

²⁵ Kangkamambe Amisye ai! Wepirati po vambunine raugaje indamu wapa anave mbambunin mamaisyo Ayao Kovo Yesus Kristus syo ravovo wasai to rai. Ayao umaso mamu rangkokai beve nugoenta rave.

²⁶ Weramu soamo ayao umaso raroron kakavimbe, mamaisyo Amisy, wepi no pitawabe, Apa bekere rai. Weye Po apa anawae wusyin matutir wo ayao umaso ratoe muno Po vatane matutir indamu wo ravovo vatan tenambe no mine so mansai indamu wanave muno ubeta Ai.

²⁷ Kangkamambe Amisye ai, webu pirati Amisy apa ana po ratantona ntiti rave! Wamo

ararimbe Yesus Kristus apa tame rai ntoa nuge
nuganui! Amin!

*Risy,
Paulus*

Ayao amisy urairi wanyin
New Testament in Yawa (ID:yva:Yawa)
Perjanjian Baru di Yawa

copyright © 2011 Wycliffe Bible Translators, Inc.

Language: Yawa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yawa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 18 Apr 2025 from source files
dated 29 Jan 2022

f32aa90e-2509-5f04-a3ab-17abf547cfde